


РУСИНИ

www.rusynacademy.sk

RUSÍN r. XXXII, č. 5 / 2022



75-рочный юбілант
Петро ТРОХАНОВСКИЙ-МУРЯНКА,
еден із найвызнамнішых діятелів
нелем меджі Лемками в Польску,
але і Русинами в цілім світі.



КУЛТУРА • ЛІТЕРАТУРА • ЯЗЫК • ІСТОРІЯ



Штефан СМОЛЕЙ

Мамко моя, чом праві я?

• Обалка третей тогорочной книжки Академії русиньской культуры в Словацькій републиці – Мамко моя, чом праві я? знамого русиньского автора Штефана Смоля з Меджілаборець.

ОБСЯГ

75-річний ювіленіст Петро Трохановський-Мурянка

Сут ріжны жытя, долі, місіі, таланты і інче, што рішат, же чловеца дорога на тым світі ма таке або інче значыня для того што было, ест і буде. Чловеце стремліня до вічності все вязало ся з уявом, же присутніст в памяті жыючых, то жытя тых, котрых серед них уж неє. Ле-нія памяті веде ся в натуральний спосіб кровным наступством поколінь (спарадигмуваній ішы біблійныма текстама), але довершат ся тіж в символічний спосіб, коли памят о дакым стає ся власністю і вартістю цілої уявної спільноты, творит для ней взоры (тіж анти-взоры) і дороговказы. Таке жытя увічнят історія або збірна памят, выберат з них важны для зрозумліня явиск і задач даного часу факты, творит потрібны легенды. Прото сут то жытя, а радше символічны, ци надреальны жытя важны, найважнійшы, якы в гідній мірі не належат уж даному чловекови, але цілій спільноті. Мусят мати таке элементы, яким спільнота надає значыня і ся з нима ідентифікує. **Вшытко сесе вводжу як вступ до ювілейной статі на сімдесятпятлітя народжыня Петра Трохановского-Мурянки**, котра – як звычайні – ма на цілі вказати конкретне жытя конкретного Ювілята, але і надати му тіж того значыня, яке потрібне ест спільноті до сохранныя і будуваня сво-йой достоменности в нелегких часах загыбаня, заниканя, корчыня ся того, што долгыма вікама было ядром-дороговказом-парадигмом. **А жытя реченого Ювіляра достойне ест той задачи як мало котре, як едно з тых, котры уж днес мож замістити в Пантеоні Зеленой Лемковины, серед найвыдатнійшых предшественників, сучастників і грядущых...** (в найщыршым вшыткых желаню). О Петрі писала ем вельо раз од вельох сторін, предо вшыткым од професийной, літературо- і культурознавчой, але тіж од біографічной, енциклопедычной і ювілейной-парадигмовой. **То уж четвертый ювілей Петра Мурянки, якій приходит мі пером честувати, думком обнимати.** Што то значыт? Конкретні, же **уж так з 40 років доля звела нашы пути і ідеме «в єднім ярмі», як то рюк сам Петро.** Символічні, же жытя і труд Петра ест предметом вельосторонной дослідничой, лемкознавчой, але тіж емоційной рефлексії, послідовні веденой през оне 40 років. Врешті – по приятельскы – же **тішу ся, што можу так безпосередньо, од середины, праві же родинні, інтымні влучыти ся в гоноруваня незаперечной цінности і вагы того уж гарді розвиненого, бо 75-річного жытя Ювілята.** А з вшыткого того бере ся характер сесого писаня, яке не ограничыт ся до вымініня біографічных даных і заслуг, якы мож додати до писаных пред десятима ци двадцетьюма роками статей.

Петрове бо жытя явит ся мі за каждым разом од інчой, маючой значыня в даным часі сторони. Перший факт, якій днес явит ся мі як основний в жыттю Петра Трохановского, то тото, же **вродил ся він – 10 серпня 1947 рока – на границі світів вызначеній Лемкам акци-йом «Вісла».** Не доходило до мя скорше тото так глубоко. Спричинил тоту свідоміст сам Ювілят, публикуючи в 2007 р. знамените описаня свойого жытя під вымовні глубокоым наголовком *A Wisła dalej płynie*¹, в яким вызначыл основны детермінанты, котры уформували його долю. Спричинила тіж днешня лемківска реальніст, котра в 75 років

Др. габ. Олена ДУЦЬ-ФАЙФЕР: 75-річний ювіленіст Петро Трохановський-Мурянка	1
Мгр. Петро МЕДВІДЬ: Воду не заставиш	4
Михайло ЗАН, к. н., Юрій ШИПОВИЧ: Наязана ойкономіка як элемент структуры карпаторусинської етноидентичности населеня днешнього Подкарпатя	5
Мгр. Петро МЕДВІДЬ: Главне місто Мадярська было центром русиністкы	11
Мгр. Петро МЕДВІДЬ: Мукачовска епархія буде мати нового блаженого Петра Павла Ороса	12
Мгр. Михал ПАВЛІЧ, ПгД.: ПОЗДРАВЛІНЯ РУСИНІВ на рік 2022 ч. 5	13
Юрко ХАРИТУН: <i>Мої пішники:</i> Мої віршы такы..., Люблять ся мі, Слова, Роса, Доброта, Мушля, Признати ся мушу, Тішить мене, Колись і днесь	13
Михал ПАВЛІЧ: Іван Боднар – Стары руцаньскы пригоды	14
Іван БОДНАР: <i>Стары руцаньскы пригоды:</i> Послідня жытельска	15
Анна ГАЛГАСОВА: Тернёва ружа, Материна клятба	17
Выголошений 9. Літературный конкурс Марії Мальцовской	20
Мгр. Михал ПАВЛІЧ, ПгД.: Зборник Штефана Смолея – Мамко моя, чом праві я?	20
Мгр. Петро МЕДВІДЬ: Творы Євгенія Фенцика дістають ся ку читателям	21
Проф. Др. Павел Роберт МАГОЧІЙ: Припоминаме собі 95 років од народжыня і 30 років од смерти Юліяна Колесара	22
ПаедДр. Іван РУСИНКО: Ородовник в Угорьскім сеймі за Свідничанів, постигнурых пожаром	23
Мгр. Петро МЕДВІДЬ: Кандідовати на пост пряшівского жупана буде і Русин із Меджілаборець – Михал Калиняк	26
Проф. Др. Іван ПОП, др. н.: Припоминаме собі 35 років од смерти Народного умельця України – Андрія Коцкы	28
Проф. Др. Іван ПОП, др. н.: Єдину вызнамну русиньску сохарьку – Олену Мандічову споминаме ку ей 120-рочу	28
Мгр. Арт. Даньєл БРОДЯНИ: Споеныі скоро зо вшыткым коло Енді Варгола	30

1 P. Murianka, *A Wisła dalej płynie*, Krynica-Legnica 2007

по оній трагічній для нас акції каже достережчи єй вымовны нецофальны ефекты, якы не дозволяють смотрити на наше тырваня з надійом, яку мала єм іщы перед пятнадцятьома роками в гідній мірі завдякы Петрови Мурянці.

Дальшы факты з жытя Ювілята стисло сут повязаны з тым першым. Дітиньство розбите медже нижньошлеску штоденніст а мрії і тугу за тамтом краіном, де ся не «встугнул народити». Вшыткы дальшы стремліня до єй одроджыня, одзысканя, воскресіня. Поворот і неуступливе, найперше романтичне, емоційне, пак позитывістычне, тверде ораня лемківского культурового ґрунту. Тото вшытко знає Мурянка получыти в єдну велику синтезу послідовности і щырошти. Але тіж тихого трагізму, якій заєдно ґенерує всеприсутний Мурянковий Біль.

Як при Петровій сімдесятпятці презентує ся сеса синтеза? Як живе свідоцтво нестаріючої ся души, в котрі любов і пасія перевершають вшытко інче, котра з роками лем мудріє, але не тратит творчого потенциялу і креатывности. Остатне пятнадцятьолітя в жыттю Мурянкы то попрощаня ся в основным з поетычным творчістю в таким значыню, як тото мож было видіти скорше, коли його ліричны выповіди креували лемківскій реінвенційний міф оснований на болю і незгоді на загыбаня. Што правда, в 2012 р. явила ся його двоязычна збірка верши *До краю ненароджыня*², але были то вершы, якы возникли до 2007р. і не несли той творчой експресіі, яка знана єст з *Як сокіл воды на камени*³. Реінвенційну ролю лірики переняла літературна автобіографія *A Wisła dalej płynie*, а лірична пасія поеты выразила ся найполнійше в *Піснях і співанках Петра Мурянкы*⁴, де музычний талант получыл ся з поезийом. Закінчыл тіж Мурянка в реченым десятиоліттю свою учительську (в дослівным значыню) місію, не вюл уж лекцій лемківского языка в школіі. Натоміст опрацувал дидактычно-енциклопедичне выданя *Пантеон зеленой Лемковины*⁵, в яком представлят найвыдатнійшых, подля його выбору, Лемків. Довершыл тіж свойого обовязку і долгу в однесію до великого лемківского «Учителя» Івана Русенка, выдаючы імпонуючу, красні опрацувану збірку його творів⁶. Выміняны осягнны остатніх десятиох років вказуют еволюцію Петра Трохановского в напрямі деякого довершаня скорійшых мрій з єдної страны і вычуваня вымогу часів з другої.

Найбарже бодай значучом творчом позиційом в тым напрямі буде довершана величезна книга села Білцарьова – рідного села Трохановских, в котрым

так дурно «не встиг ся Петро вродити», як сам з жальом вельо раз написал. Тота, понад 1000-стороницьова книга, то велика не лем споминова праца автора. То предо вшыткым вельосторонна монографія, в якій Петро Трохановскій вмістил свою пасию історика, документалісты, дослідника лемківской культуры і горячого патрийоты, любителя рідности. Книга-монографія Білцарьовой роками ходила за єй автором, іщы товды, коли на выгнаню, на земли свойого тілесного вроджыня, деси там в понімецькым Пархові, малювал мапы Лемковины, крислил розплянуваня рідного гірского села, барвил душу камениками з білцарьовской річкы, о котрых так уявисто оповідали му няньо, якых іщы на живо не виділ, яле виділ іх душом і мріямы. Книга основана єст на документах, але тіж на уяві души Петра, яка єст так само вірна, а бодай і вірнійша як неєден документ, бо підповідана любовю і ґеновом інтиційом, збірном памятю предків, вірністю спільнотовым архетыпам, якы николи ся не мылят. Книга Білцарьовы высловлює цілого Петра – Білцарьовяна, Лемка, анти-паралелю акції «Вісла».

При вказаній еволюції, розвиваючій, але тіж довершаючій мрії і надії Ювілята, остає він надале вірний і по мурянчому послідовний в веденых ціле праві жытя своїх діянях і дотримуваных поставах. **Такой праві уж 35 років отримуєме журналістычно едиторскій труд жытя Мурянкы, «Бесіду» – лемківскій двомісячник, авторско ведений його головным редактором. Шторічні прикликуваны сут важны історичны і персональны факты завдякы покликаному до жытя Петром і уж 30 років выдаваному «Лемківскому календарьови»/ «Лемківскому Річникови».** Не перестал він тіж заимати ся трансляторском роботом. В остатнім пятнадцятьліттю довершыл свої величезны труды перекладаня на лемківскій, ци радше лемківщыня, адаптуваня до сучасной языковой нормы, знаменитых творів лемківской класики – Петра Полянського і Владимира Хыляка. Вірний остал тіж Петро лемківскому соспільному і церковному жыттю. Веде з посвячыньом і значучыма ефектами церковний креницькій хор, дякує в креницькій церкви, неуявны сут без него єпархіяльны і загальнодржавны церковны торжества. Далє організує конґресы, Бієннале Русиньской/Лемківской Культуры, Лемківскы Творчы Осени, анґажує ся в Лемківскы Ватры на Чужыні, події організуваны «Руском Бурсом» в Горлицях. **Коли лем може, не одмавлят никому, хто го попросит о презентацию лемківской культуры, ци то в наших, ци в польских, ци заґраничных середовисках.** Адде

2 П. Мурянка, *До Краю ненароджыня*, Крениця-Ліґниця 2012.

3 P. Murianka, *Jak sokół wodę z kamienia/ Як соків воды на камени*, перл. В. Dohnalik, Warszawa 1989.

4 *Пісні і співанкы Петра Мурянкы*, упоядкували П. Малецкій, А. Трохановскій, Горлиці 2012.

5 *Пантеон Зеленой Лемковины*, выбір, редакция, вступ П. Трохановскій, Горлиці 2008.

6 *Русенко – выбране*, ред. П. Трохановскій, Крениця-Ліґниця 2010.



• Наш 75-рочный юбілант Петро Трохановський-Мурянка з Криниці зо своєю женою.

Мурянка – адде Чловек, адде Лемко, як написал о ним в 1983 при першій публикуванні збірці верши *Suchy Badył*⁷, видавця, Мечыслав Мончка. «Талант Петра фурт ся розвиват. Бесідувати треба радше о талантах»⁸. Днес пишеме о плодах тых талантів. **Ювілей 75-літя народжыня то нагода до синтезуючых, сутьовых уваг о жыттю і осягнінях.** Хоц, як речено, розвита і креатывніст не заперат ся в тым припадку таком ци інчом категорійом жытових чысел, вызначеныма рокамі границяма. Покля чловек має мрії і стремліня, потля ма творчу силу. Перед пятнадцятьома рокамі Петро втішыл ся з хыбы в його роках, коли приятеле вінчували му з нагоды 80-ткы. «Кед-бым дожыл тых рокав, яких мі желате, то довершыл бы-м вшытко, што мрію в жыттю зробити...». Єдном з тых мрій была речена книга села Білцарьова. Днес мрія ся довершыла. Адже послідовніст і впертий труд недаром присвоілі Ювілятови так неодлучний його псевдоним – Мурянка.

Знам, же Петрови остало ішы гідні мрій і задач (в тым докінчыти обшырну лемківску повіст), напевно старчыт іх до 80-ткы, а думам, же іх довершаня, як все, додаст му жыттьовых сил і почутя, же выпол-

нят свою велику місію, яка вызначена му остала на долго ішы перед народжыньом, коли то місцевий жидівскій мудрец Цапок выворожыл з псалтыря його Матери Ксандрі «Вельо уж перешла єс жено і вельо ішы перейдеш, але доховаш ся двох сынів і в велькій пошані будут іх мати люде»⁹. Тото почутя спрчынило тіж написаня Мурянком єдною зо знаменитшых, симптоматичных фраз, важного ліричного маніфесту:

*Великы діла кажут мі писати
кажут величати
як жытя сіль
конаня біль*¹⁰

Долгы роки не вірила єм тій прошыбаючій до глубины выповіди, же нам, «повісляным» поколіням остає як місія величати «конаня біль». Мурянка знал тото од самого здає ся вроджыня. Кілько героїзму, одречыня ся власных потреб, посвячыня треба, жебы з таким детермінаційом, без зневіры служыти загыбаючій Лемковині, коли ся зна, же то конаня, же «Вісла дале плыне», значыт заберат, топит, розмыват помалы вшытко, што ма загыбнути

7 P. Murianka, *Suchy badył*, Z. Zegadłówna, Nowy Sącz 1983.

8 MM, [Oto Petro Murianka...], [в:] там же, текст на задній окладниці.

9 P. Murianka, *A Wisła dalej płynie*, с. 24.

10 П. Мурянка, *Рекомендация*, [в:] Тот же, *Як сокіл воды на камені*, с. 114

в ей неустанным течыню. 75 річниця народин Петра Муриякы, котра єст єдночасно 75 річницём початку акції «Вісла», текучой проти нашому народови, усвідомила мі глибоку правду трагічного маніфесту. Реінвенційний міф, в творіня котрого ангажувало ся ціле покоління зосереджене на Болю, што подля Петра остал вміщений в лемківскы гены, формувал етос тырваня, якій все вяже ся з посвячыньом. Конец архаічной парадигмы посвячыня, котра остала заступлена сучасным центровым думаньом, яке матафоричні мож назвати «бізнесовым», спричинил конец спільнотовой солідарности, де успіх каждого «свого» тішыл і был узнаваний за спільне добро. Бізнесовы принціюы основуют ся на конкуренційности, антиспільнотовым механізмі, якій єст проявом уж барз глибокого, системового наслідства текучой «вісляной» модерности.

Петрове жытя, зачате оного рока «при яким і Anno Domini подавати не треба», то явний і вымовний символ протиставліня розливаючому ся штораз шырше і штораз глүбше течыню «Віслы». Обходиме, по звыку річниці, якы сут повязаны зо собом не лем календарьовом датом, але предо вшыткым сутю протиставности і опору. Ци при таким символічным сутьовым получыню

не стає ся основным для Лемковины і Лемків желаня Петрови

Трохановскому-Муриякці як найдолжшого жытя і як найдолжшого тырваня усимволічной тым жытьом ядровой спільнотовой вартости – любви до рідности, яка спричынят всеціле ій посвячыня.

ЛИТЕРАТУРА

P. Murianka, *A Wisła dalej płynie*, Krynica-Legnica 2007

П. Муриякка, *До Краю ненароджыня*, Крениця-Лігниця 2012.

P. Murianka, *Jak sokół wodę z kamienia/ Як соків воды на камени*, перф. В. Dohnalik, Warszawa 1989.

Пісні і співанкы Петра Муриякы, упоядкували П. Малецькій, А. Трохановскій, Горлиці 2012.

Пантеон Зеленой Лемковины, выбір, редакция, вступ П. Трохановскій, Горлиці 2008.

Русенко – выбране, ред. П. Трохановскій, Крениця-Лігниця 2010.

P. Murianka, *Suchy badyl, Z. Zegadłówna*, Nowy Sącz 1983.

ММ, [Oto Petro Murianka...], [в:] тамже, текст на задній окладинці.

P. Murianka, *A Wisła dalej płynie*, с. 24.

П. Муриякка, *Рекомендация*, [в:] Тот же, *Як сокіл воды на камени*, с. 114

Єст то фраза, яку Муриякка часто повтарят в тексті *A Wisła dalej płynie*.

(Публікуєме в роднім языку юбіланта – лемківськым варіанті русиньского языка.)

Мгр. Петро МЕДЕВИДЬ, ЛЕМ.фм

Воду не заставиш

Воді ся мож піддати, або ей схосновати

Минуло вже 75 років од часу, коли ся в Польщі одбыла такзвана Акція Вісла, яка мала катастрофічны наслідкы про історічну Лемковину і ей русиньске населіня. А Вісла дале плыне..., як написав і Петро Муриякка.

Кебы ся ня хтось позвідовав, як подля мене вызерать конець світа, думам, же по двох споминовых подіях, ку 70-ій і 75-ій рочніці Акції Вісла, бы ем му повів, ный ся иде посмотрити до днесь неествуючих русиньскых сел на Лемковині, якыма суть, наприклад, Чертіжне і Білічна.

Покля чоловік прийде на тоты місця і зохабить на себе впливати вшыткы емоції, котры там мож чути, пак собі скоріше або пізніше мусить усвідомити, же якраз тоты місця евокують конець єдного світа. Світа, котрый ся вже не верне.

Покля бы ем бісїдовав при тых селах о русиньскых Помпеях, не був бы ем далеко од правды. Хоць причіна зникнутя спомянутых сел была інша, але якраз то є на тім найтрагічніше. Ніч не залляло тоты села, жебы ся в них не дало жыти. „Залляла“ іх лем Вісла. Не ріка, але Акція Вісла, котру комуністїчна Польща приготвила своїм жытелям.

Іщі днесь жыють люде, котры прямо зажыли тоту

ганебну історію на властній скорі. Їх свідоцтва ся не слухають легко. Емоціям ся в таких хвілях не мож бранити.

Але єднако емоціонално тяжке є быти на місцях, в неествуючих селах, в котрых з дня на день настав конець світа. Конець, з котрого уж не є пути назад, конець світа, з котрого зістало лем пару хрестів на цінтерї, ці старый храм, якы іщі, затля, свідчать о якійсь цивілізації, котра ту жыла.

В рамках тогорочной події, котров сьме собі припомянули півокруглу рочніцю выгнаня з властных обысть, заінтересовала ня іщі єдна річ. Богдан Копча приготвовив мапы, штатістїкы, графы, котрыма барз пластїчно вказав, якій аж великий негативный вплив мала дана акція на нашых Русинів, котры цілы стовкы років жыли у своїх горах, і котры з дня на день были насилно выселены на землі, де зістали як стромы без коріня.

Відіти реалны чїсла, котры говорять о асіміла-

ції, яка на основі того барз легко перешла, о страті ідентичности, о страті природной теріторії, кедьже лем мала частка людей ся пізніше вернула на Лемковину, не суть о ніч менше депресивны, як стояти на місці, де колись было село, ці слухати прямих учасників Акції Вісла.

Є правилне акцентувати, же Вісла дале плыне. Она ся не застала. По Акції Вісла ся уж ніч не вернуло, а ани ся не верне до жывота, якый був перед нёв, бо то є неможне. А тырвать, плыне, бо она поступує, што відіти, наприклад, при дале поступуючій асіміляції.

А то бы сьме могли припомянути і то, же плыне дале і з того погляду, же доднесь Лемкы, хоць мають свої народностны права, підпору з державы, зістали так дакус в другій категорії, бо, наприклад, їх маєткы – лісы „не мож вернути“ тым, котрым были взяты.

Над водов, як єдным із штирєх основных природных елементів тяжко звітязити. Стары люде бісідують і таку мудрость, же вода гірша, як огонь. Огонь загасиш, але воду не загасиш, а властно ей ани не заставиш. Кедь прийде, бере вшытко.

На другім боці, люде ся научили з водов робити. Днесь знають управити водны токи, роблять гати, знають воду схосновати так, жебы їм была на благо, і жебы їх не знічила. А наведе, вода давать новий жывот, без воды бы не выросло ніч.

Воду не заставиш, но мож ся їй піддати і смотрити на кінець світа, або ей схосновати на благо, на новий жывот.

Ани воду, котра є звязана з Акцієв Вісла, не заставиш. Лемже діяня Лемків од 1989-го року вказує, же



до даякой міры ся їм подарило управити токи, зробити якусь гать, хосновати воду, жебы не была лем тым елементом, котрый вшытко знічить, але жебы дала і новий імпульз про жывот Русинів у Польщі.

Хоць Вісла плыне дале, з мірным оптимізмом вірю, же Русины в Польщі вкажуть і в результатах списованя, же ся воді з Акції Вісла не піддали, і же жывот Лемків таксамо плыне дале.

Статя была написана як коментарь „Вступне до контролю“ лемківського радія lem.fm.

Михайло ЗАН, кандидат историчных наук, доцент катедры політології и державного управління Ужгородського національного універзитета, член Русинського культурологічного клуба,
Юрій ШИПОВИЧ, председа сосполної організації «Русинський культурологічний клуб»

Наязана ойконіміка як елемент бінарної структури карпаторусинської етноідентичности населеня днешнього Подкарпатя

(По звіданю штодо навернення историчных назв поселеньом закарпатської области Украйины.)

Постановка проблемы. Колективна тямка є системоутворювальным чинником формованя й передачі межепокілінної інформації. Німецький историк Ян Ассман поязав колективну памнять из категорійов часа й выділив два базові єї форматы: комунікативна й культурна тямка. Кедь комунікативна тямка тыкать ся єдного-двох, у ліпшому трафунку – трьох поколінь, товды культурна формалізує ся в текстах, символічных містах, монументах, назвах тых ци иншаких обек-

тив матеріальної культуры¹. Треба одзначити, што про представникув каждого етнічного рокаша в першум шорі близьков є родина й милі про слух челядника назвы рік, озер, гор, зворув, плацув, улиць, сел, селищ и варишув. Зайсе ойконіміка выступать неодмінным атрибутом символізації окружаючого ландшафта, важным елементом формованя етноідентичности.

Німецька культурологиня Аляйда Ассман продовжать идеї свого чоловіка й констатує, што



паралельно функують «жива, індивідуальна пам'ять» й «штучна культурна пам'ять», котра «охоплює епохи й спирається на нормативні тексти»². Само собою, ож похожі тексти обмежені політиков памнати, яку ретранслуює панувуча влада, політичний режим. Беручи до позура концепт британського антрополога Пола Коннертона, мож констатовати, што політична історія Подкарпатя 20 стороча позначена цілеспрямованов політиков «репресивного стирання» колективної тямки етнічних рокашув (и русинув тоже), а такой «забування задля формування нової ідентичності»³. У першум шорі йде ся про політику конструйованя етнокультурної приналежности русинської етнічности до української нації.

Як справедливо примітив знамний лінгвіст Петро Лизанець, «внаслідок колишніх політичних амбіцій 1910–1913 та 1945–1946 рр. в історичні назви населених пунктів Закарпаття була внесена велика плутанина»⁴. До приміру, лем у Свалявському районі село Плоське яло ся называти *Dombostelek* («горбковита земля»), Павлово – *Kispálos* («піціцький монах»), Неліпино – *Hársfalva* («липове село»), Оленьово – *Szarvaskút* («оленьчий колодязь»), Солочин – *Királyfiszállás* («поселеня королевича») і т.д.

Кедь на зачатку 20 ст. подкарпатські села набыли мадярських лексем, то в 1940-х роках была зачата робота нарубы - з цілов радянїзації й приведеня од українському літератур-

ному стандартови назв поселень края. Гибы за законом кармічної одплаты, за Указом Президїї Верховної Рады УРСР од 25 юнія 1946 рока «Про збереження історичних найменувань та уточнення і впорядкування існуючих назв населених пунктів Закарпатської області», се одбыло ся в першум шорі по мадярськоязычных селах края. Їх назвы набыли домак чудного про корінних жителюв звучаня: Струмківка (Сюрте), Дзвінкове (Горонглаб), Деренковець (Шом), Липове (Гетен), Добросілля (Бене), Зміївка (Кідьош), Лужанка (Астей), Бобове (Тисобикень), Братово (Ботар) и т.д.

Пиля сього «уточнювалися» й традиційні назвы многих закарпатських сел. До приміра, села Андрашувци «перехрестили» на Андріївку, Рядїдь на Бистрицю, Велику Чингаву на Боржавське, Німецьку Мокру на Комсомольськ, Берлебаш на Костилівку, Ляховець на Лісковець, Брустури на Лопухів, Угочанську Розтоку на Малу Розтоку, Середню Апшу на Середнє Водяне, Нижню Апшу на Діброву, Требушани на Ділове, Серенчювци на Щасливе й т.д.⁵

Изглядатель процесув радянїзації Закарпатя подовж 1994–1950 рокув Василь Міщанин констатовав, што перейменованя тыкало ся майже пятидесяти поселень края, айбо радянїзаторы «не хотіли зупинитися. У 1949 р. вони пропонували Мукачево перейменувати в Октябрськ, Хуст – на Красногорськ, Иршаву – на Синяву, Рахів – на Комсомологорськ, Тячів – на Шевченкове, Воловець – на Перевал і відповідно Воловецький район на Пере-

вальський район. На щастя, це не було втілено в життя»⁶.

Ги нам ся видить, про корінних закарпатцюв, до приміра, представителюв русинської етнічної сосполности, природнов є бінарна структура свідомости, яка одобразила ся й на специфіці етнічної самоідентифікації, чертах менталности. Она находит ся у двойнуй толеранції релативно: 1) етнонімув («українци» й «закарпатци» («русини»); 2) одлічення часу (київський (майскорі й московський) й місний середньоевропейський, а паралелно й так званый «церковный» час); 3) ойконіміки (наязана – радянїзована й місна – исторична). Тому закарпатци (маеме на позурі автохтонное словянськое населеня, котрое всокотило идентичность «русин» вадь признає себе «закарпатцями» й одмежовує ся од «українців», исклучавучи місних мадярув, ромув, румунув и др. – М.З., Ю.Ш.) вповодж довгого часу звычайно, паралелно й в зависимости од контекста («Свої» / «Інші» / «Чужі»; село / місто / «Україна» / закордоння тощо) хоснують ту вадь иншаку термінологію.

Аналіз послідніх изглядвань и публікацій. Треба одмітити, што проблематика одновлення историчных назв поселень днешнього Закарпатя першый раз была рушена в 1997 роци в научнуй публікації Петра Лизанця. Вчений акцентовав позур на назвах мадярськоязычных поселень, котрі лінгвіст предложив подавати в усталенуй языкувй практици населеня⁷. Єден з авторув сьой научної розвідки (М.З.) у 2003 роци такой обертав позур на рушену Петром Лизанцьом проблему в контексті изглядования этнокультурных процесув у 90-ті роки 20 ст.⁸ Комплексное изглядования динаміки закарпатського урбанонімікону вповодж 20 – зачатка 21 стороча представлено в кандидатській дисертації філологині Оксаны Галай⁹.

Цільов чланка є вчиненя моніторингу наязаной радянськов владов ойконіміки в розрізі бывших 13-ти (до децембра 2020 року – М.З., Ю.Ш.) районув Закарпатської области.

У контекстови поставленой ціли маеме дяку рішити шорові завдання: 1) погатковати процес одновлення историчных назв окремых населеных пунктув области; 2) дефіновати число радянїзованих назв населеных пунктув по районах, из одновленьом яких тягнуть дале; 3) сформольовати высновки й пропозиції штодо подалшого научного изглядования проблематики й єї практичного рішення на уровни органув державної влады й місцевого самосправования.

Выклад основного матеріалу. Майнаперед треба зазначити, што лем в умовах гласности й демократизації зачатку 90-х рокув минулого стороча многым закарпатським селам были наворачнүті їх историчні назвы. Так 12 юлія 1991 року на VI сесії Закарпатської обласної рады XXI кликаня были приняті рішення «Про відновлення историчных назв

окремых населеных пунктув области та їх відтворення на мовах інших національностей» й «Про зміни в адміністративно-територіальному устрої области», які стосувалися сіл Берегівського району¹⁰.

Плодовитов стала ухвала обласної рады од 23 децембра 1992 року «Про відновлення та уточнення назв окремых населеных пунктув». Депутаты обернули ся з просьбов до Президії Верховної Рады Украйины, што ся тыче одновлення историчных назв и уточнення окремых назв населеных пунктув Ужгородського, Мукачовського, Береговського, Виноградовського, Хустського й Воловецького районув. Вказовало ся, што пиля державного, языком майбулш чиселної мадярської меншины края хоснують ся назвы, які є традиційныма про місце мадярськое населеня: Яноші (*Jánosi*), Батьово (*Bátyu*), Дерцен (*Dercen*), Вишково (*Visk*) и др.¹¹

Рішеньом Закарпатської обласної рады од 6 апріля 1995 рока «Про зміни в адміністративно-територіальному устрої та уточнення назв окремых населеных пунктув области» булшость закарпатських сел вернули собі обычное, місце звучаня на «-ово», замість непрактичного про закарпатцюв «-ове»: Квасово, Порошково, Смереково, Буківцьово, Лалово, Пістрялово, Данилово, Золотарьово, Рокосово, Чумальово, Драгово и тд.¹² Айбо и до днесь лишили ся «стандартизоваными» радянїзаторами, айбо практично не хоснованыма місным населеньом назвы: Берегове, Ставне, Ялове, Задільське, Репинне, Вучкове, Лопушне, Ділове, Дубове, Колодне, Воноґове, Бобове, Довге, Букове, Нове Клинове, Вербове, Вінкове, Вовкове, Голубине, Яківське, Плоске. Про искусственность сьых адекватных вчинень, наязаных радянськовц владов у 1946 роци, справедливо одзначав у своуй роботі «Прізвища закарпатських українців: Историко-etimологичный словарь» знамный вчений-філолог Павел Чучка¹³.

Одповідно рішення обласної Рады од 18 фебруара 1997 рока «Про зміни в адміністративно-територіальному устрої области» были одновлені назвы окремых сел Виноградовщины, а именно Форголань (Дівчине), Фертившолмаш (Заболоття), Оклі Гедь (Клинова Гора), Неветленфолу (Дяково), Пийтерфолво (Петрово) и др.¹⁴

Рішеньом од 20 юлія 2003 рока Закарпатська обласна рада перейменовала румуноязычное село Діброва на Тячовщині, вернувши му традиційну историчну назву Нижня Апша¹⁵. Лем на зачатку 2016 року в контексті всдержавных декомунізаційных процесув было вернуто историчну назву селу Німецька Мокра на Тячовщині¹⁶. Днесь тяжко збачувати, айбо щи шість рокув тому офіційно се село йменовало ся Комсомольськом (! – М.З., Ю.Ш.).

Пропозіровучи неодповідность меже историчныма назвами й їхніма радянськыма еквівалентами варта подмітити, што наднесь ся так и лишавуть радянїзованыма десяткы поселень Закарпатя. Місце населеня вже привыкло од їх паралелному хосно-



ваню: «по-нашому» меже «Своих» й офіційно про «Иных» и «Чужих». Се, до приміру, й села в межах бывшего **Тячовського району**: Лопухів (Брустуры; похожий ойконім є такой на Свалявщині – Лопушанка (Брустув), Тарасівка (Терешул), Руське Поле (Великое й Малое Урмезийово), Добрянське (Нягово), Глибокий Потік (Стримтура).

У сусідньому Раховському районі – Верхнє Водяне (Верхня Апша), Середнє Водяне (Середня Апша), Водиця (Апшиця), Костилівка (Берлибаш), Кваси (Боркут), Ділове (Требушани). На Хустщині – Олександрівка (Шандрово), Стеблівка (Салдобош), Монастирець (Моноштор), Яблунівка (*Фенеш*).

Мукачовський район такой має фест нерадянїзованих назв сел: Бистриця (Ряпідь), Зубівка (Фогораш), Ільківці (Єнківці), Крите (Феделешівці), Кучава (Німецька Кучава), Коноплівці (Кендерешів), Чомонин (Чонгор), Щасливе (Серенчувци). Интересным є факт: позад чого в 1992 роци Анталовцям (за часув СРСР– Антонівка) на Ужгородщині вернули историчну назву, а Андрашувци так ся и обстали Андріївкою, а Бачава – Чабанівкою?

Из часув дїтвацтва припоминають ся парадокси хоснованя подуфлованої ойконімікы на Севлющині. До приміру, єдноселчани з Великих Кумнят (село діла місных й надале конструє ся у тримірному просторі Малых (Мадяр) Кумнят, Великих Кумнят й Завадки – М.З.), одвідуючи сусідні села з радянїзованима назвами «Боржавське», «Вільхівка», «Кам'янське» вадь «Олешник», ги правило, так їх не называли. Місноє населеня сього не робить до днесь. Люде сохташно кажуть, што йдуть до Чингавы, Влахова, Кивяжди вадь до Егреша.

Требало вбернути позур на вто, што на Севлю-

щині радянїзованов лишать ся назва бывшего районного центра вариша Виноградів (Севлюш). Радянїзованима є далші села: Боржавське (Велика Чингава), Олешник (Егреш), Підвиноградів (Ардів), Чорнотисів (Чорний Ардів), Дротинці (Сірма), Букове (Фоковбіки), Тросник (Шашвар), Затисівка (Чома), Притисянське (Чонкаш), Хижа (Мала Тарна), Широке (Вышній Шард) и Нижнє Болотне (Нижньої Шард).

У сусідському, бывшому **Иршавському районі** такой лишать ся фест радянїзованих назв: Вільхівка (Влахово), Кам'янське (Кивяждь), Заболотне (Шардик), Горбок (Шаркадь), Приборжавське (Задньоє), Велика Розтока (Бережанська Розтока), Мала Розтока (Угочанська Розтока), Підгірне (Волоськоє).

Про мусайность одновлення историчных назв поселень Закарпатя вопіюче свідчить примір двох сел на Свалявщині – Извор и Изворська Гута (Извор-Гута), котрі в 1946 роци были перейменовані на Родниківку й Родникову Гуту. Авторитетный вчений-філолог Петро Лизанець, як уроженець села Извор, у многих публікаціях неєдноразово вбертав позур сосполности, што руськоязычный термін «родник» (по-українськы «джерело») появило ся на зачатку 18 ст., а старословянська назва «извор» стрічать ся у письмовых жерелах вже на зачатку 16 ст.¹⁷ Тому алогічным є вчиненя назвы од терміна, якого на час появы села не было «в природі»...

Позад сього головный парадокс у одновлені назв поселень края є в тому, што окремі села вернули историчні назвы, а дакотры й надале чекавуть на шоровоє «звершення историчної справедливості». Так, позитивным є опыт села Ляхівці на Ужгород-

щині. Оно знамноє в историчных жерелах из 15 ст. й, очевидно, было засновано выходцями з Польщі. За часув Радянського Союзу село называло ся Лемківцями, айбо в кунци 1992 року йому было вернуто историчну назву. З другого бока, маєме негативный опыт: у 1946 році село Ляховець (теж полонізм – М.З., Ю.Ш.) у Міжгірському районі было перейменовано на Лісковець. Ся штучна назва лишать ся офіційнов до днесь...

Наближавучи ся до запертя викладу нашої студії варта обернути позур на доста цінноє й практичноє про карпаторусинистику виданя «Карпаторусинські поселеня. Лішта сел и варошув у Централнуй Европі, де днесь бывавуть вадь даколы бывали Карпаторусини», якоє недавно подготовив знамный карпаторусинський філолог др. Михаил Капраль. В книжци вун паралелно подає три (русинську, украинську й мадярську) назвы поселень й фест розширює контуры нашого интереса проблематиков наязаної ойконімікы на Закарпатю¹⁸.

Проблему, яку рушать вчений, на правду є болючов, бо твердо засвідчує, як стирають ся народный сохташ и память. Ги резултат, што видиме свойима очами (М.З., Ю.Ш.), одбывать ся асіміляція карпаторусинув, їх языково-лексемна уподоба до вкраїнської идентичности. Тому назвы, які місноє населеня наголошує в давнуй карпаторусинській варіації, дійсно, тратять свуй колорит в украинському літературному форматі. При сьому змінюють ся роды, єднина й множина в назвах поселень. До приміру, кедь місні карпаторусини, одлико старшого покоління, звично называвуть село «Велятино» (середный руд), то в офіційному украинському звучаню оно набывать такой нараз чоловічий руд – Велятин. Так се має місто у трафунку й инных закарпатських сел: Глубока (русин.) – Глибоке (укр.); Гуклива (русин.) – Гукливий (укр.); Дубина (русин.) – Дубино (укр.); Кічорна (русин.) – Кічерний (укр.); Кленувци (русин.) – Кленовець (укр.); Криве (русин.) – Кривий (укр.); Лозянськое (русин.) – Лозянське (укр.); Росоші (русин.) – Росош (укр.); Смерекова (русин.) – Смереково (укр.); Тростяніці (русин.) – Тростяниця (укр.); Хомці (русин.) – Холмець (укр.); Чабина (русин.) – Чабин (укр.) й др.

З другої стороны, заради научної обективности, мусиме овернути позур и на єден дискусійный аспект у карпаторусинських назвах поселень Закарпатя, котрі наводить др. Михаил Капраль. На наш позур, у окремых трафунках автор подає суто мадярські одповідники назв сел, котры хосновали ся (они можуть и тепер паралелно хосновати ся такой пиля русинських ци украинізованих русинських – М.З., Ю.Ш.), айбо наразі вже выйшли з хоснованя помеже місцевым обывателством. У трафунку евентуального голосованя на локальному референдумі (што є раз заперто в Україні на законодавчому уровни – М.З., Ю.Ш.) за навернення до таких назв, місна людность, ги нам ся видить, їх

бы вже не приняла як «Свої». Йде ся за Урмезієво / мадяр. *Úrmező* (Руське Поле), Гедьфарок / мадяр. *Hegyfark* (Підгорб), Динкувці / мадяр. *Dengláz* (Великі Лазы); Керекгедь / мадяр. *Kerekhegy* (Округла), Комловшка / мадяр. *Komlós* (Хмільник).

Айбо, зауважимо, што в сьых трафунках мусайні суть конкретні соціологічні опросыня вадь студії на етнографічному дарабі названих сел. Природньо, што окремі назвы можуть быти й толерованыма меже місных людей. Напримір, што тывать ся Егреша (тепер – Олешник) / мадяр. *Szőlősegres*, то из свого практичного опыта (М.З.), можеме подтвердити факт паралелного фунгованя обидвох назв: старої – Егреш и «нової» (з 1946 рока) – Олешник. Єдночас, тяжко вповісти, якименно бы ся высловили місні люде штодо доцілности вернення назвы «Егреш» на офіційному уровни. Се вже окремоє, дуже делікатноє й дипломатичноє діло лідерув мерьковань и рокашув интересув у локалнуй димензії. Ясно, же фурт у соціумі є котрась частка активної челяди, котрі мавуть дяку одстойовати «правильну» думку місного населеня, й иншака – опозиційна «точка зору», котра боронить «Своих». У сьому контексті єдному з авторув (М.З.) спадать на тямку, як пиля десятка рокув тому близь Ужгорода представники мадярської сосполности встановили ниже табличкы «Розівка» – кириличный (! – М.З.) надпис «Кетергинь» (назва села мадяр. *Ketergény*). Через дакотрый час майпотум вун просто ... зник. Місні ж люде й надале звично хоснують офіційну й менше – паралелну юй мадярськоязычну назву села.

Вконци матеріала про позитивні «знакы» про карпаторусинську перспективу вернення од историчным назвам поселень Закарпатя. 24 юлія 2022 рока на Фейсбук-сторонци знамного туризмознавця, депутата Закарпатської обласної ради Федора Шандора появил ся текст його звернення до голов Усть-Чорнянської й Вилоцької селищных громад из пропозиційов одказати ся од «архаїзмів радянської тоталітарної епохи» у назвах сел Пушкіно й Лопухів и «з метою відновлення історичної справедливості та збільшення туристичної привабливості регіону» Лопухів перейменувати на Брустури, а село Пушкіно – на Новий Вербовець (Уй Вербоц)¹⁹. Маєме надію, што в контексті нашої студії ги звык был приказовати герой «Дванадцяти стульцюв» Остап Бенедер: «Леды ся крянули!» вже й на практичному уровни...

Высновкы и перспективы далшых студіовань. На наш позур, рушена туйкы проблема выборочного вернення назв населених пунктув Закарпатя вартвала бы справедливого рішеня. На зачатку – на уровни територіальных громад, а по тому – районных рад, Закарпатської обласної ради й Верховної Рады Украины. Се – реалноє діло й не такое тяжкое про практичну реалізацію. Майже у вшиткых районах края, за выключеньом бывших готарув Бе-

реговського, Воловецького, Великоберезнянського й Перечинського районів, є актуальною проблемою оновлення історичних назв поселень. У першому шорі се ся тыкать Виноградовщини (Севлющини), де таких є майбулше.

Ясно, што не вшиткі історичні назви потребувуть наведення на офіційному уровні. З єдного боку, шор населених пунктів, Міжгір'я (до 1953 року – Волове), Негровець (Верхня Колочава), Верхні Ворота (Вишні Верецькы) й Нижні Ворота (Нижні Верецькы), стали сохташныма й органічно «вписалися» у языкову практику місцевого населення. З другого, жителі окремих сел не видять практичної мусайности у наведенню історичних назв. Зокрема, йдеся про села близь обласного центра – Розівку (Кетергинь) и Сторожницю (Йовра). Критичні й категоричні думкы про саму можливість/евентуальность вернення історичних назв сим селам авторам приходилося чути од окремих місних жителюв.

Через се, нам ся видить, ож подвойна ойконіміка, як лінгвокультурный феномен закарпатцюв, чекать на далшое изглядюваня у далшых димензіях:

1) на уровні історичних изглядювань – проаналізувати динаміку змін назв населених пунктів края у залежности од політики памянтя правлячої влады;

2) на уровні культурно-антропологічних студій – изучити каждоденный дискурс хоснованя населенням історичних й офіційних назв сел, селищ и варишув;

3) на уровні соціологічного звіданя – зясувати готовность / неготовность населення до вернення історичних назв населеним пунктам и, в конци, до повноцінного завершеня процесу декомунізації й дерадянізації днешнього Подкарпатя.

ЖЕРЕЛА Й ЛІТЕРАТУРА

Документы:

Відомчий архів Закарпатської обласної державної адміністрації, Ф. 195. Закарпатська обласна Рада народних депутатів, Оп. 14. Діловодство, Спр. VI сесія Закарпатської обласної Ради народних депутатів XXI скликання та рішення, прийняті сесією від 12 липня 1991 р., на 222 арк.
Відомчий архів Закарпатської обласної державної адміністрації, Ф. 195. Закарпатська обласна Рада народних депутатів, Оп. 14. Діловодство, Спр. XI сесія Закарпатської обласної Ради народних депутатів XXI скликання та рішення, прийняті сесією від 23 грудня 1992 р. Друге засідання, на 302 арк.
Відомчий архів Закарпатської обласної державної адміністрації, Ф. 195. Закарпатська обласна Рада народних депутатів, Оп. 14. Діловодство, Спр. II сесія Закарпатської обласної Ради народних депутатів XXII скликання та рішення, прийняті сесією від 06.04.95. Перше засідання, на 337 арк.
Відомчий архів Закарпатської обласної державної адміністрації, Ф. 195. Закарпатська обласна Рада народних депутатів, Оп. 14. Діловодство, Спр. VI сесія Закарпатської обласної Ради народних депутатів XXII скликання та рішення, прийняті сесією від 18 лютого 1997 р., на 213 арк.
Постанова Верховної Ради України від 4 лютого 2016 року Про перейменування окремих населених пунктів та районів // Верховна Рада України. Законодавство України. URL: <https://zakon.rada.gov.ua/laws/show/984-19#Text> (дата звернення: 12.12.2020).
Постанова Верховної Ради України від 5 лютого 2004 року «Про перейменування села Діброва Тячівського району Закарпатської області» // Верховна Рада України. Законодавство України. URL: <https://zakon.rada.gov.ua/laws/show/1470-IV#Text> (дата звернення: 12.12.2020).
Указ Президії Верховної Ради УРСР від 25 червня 1946 року «Про збереження історичних найменувань та уточнення і впорядкування існуючих назв населених пунктів Закарпатської області». URL: Указ

Президії Верховної Ради УРСР від 25.6.1946_ «Про збереження історичних найменувань та уточнення...назв...Закарпатської області» (дата звернення: 12.12.2020).

ПОЗНАЧКЫ

- 1 Ассман Ян. Культурная память: Письмо, память о прошлом и политическая идентичность в высоких культурах древности / Пер. с нем. М.М. Сокольской, Москва, Языки славянской культуры, 2004, с. 53–54.
- 2 Ассман Аляйда. Простори спогаду. Форми трансформації культурної пам'яті / Пер. з нім. К. Дмитренко, Л. Доронічева, О. Юдін, Київ, Ніка-Центр, 2012, с. 22, 24.
- 3 Connerton Paul. *Seven Types of Forgetting* // *Memory studies*, 2008, Vol. 1, № 1, pp. 60, 62–64.
- 4 Лизанець Петро Миколайович. Питання про відновлення історичних назв населених пунктів Закарпаття та принципи їх написання // Матеріали науково-практичної конференції «Державне регулювання міжгетнічних відносин в Закарпатті», Ужгород, Патент, 1997, с. 102.
- 5 Указ Президії Верховної Ради УРСР від 25 червня 1946 року «Про збереження історичних найменувань та уточнення і впорядкування існуючих назв населених пунктів Закарпатської області». URL: [Указ Президії Верховної Ради УРСР від 25.6.1946_ «Про збереження історичних найменувань та уточнення...назв...Закарпатської області»](https://zakon.rada.gov.ua/laws/show/1470-IV#Text) (дата звернення: 12.12.2020).
- 6 Міщанин Василь Васильович. Радянізація Закарпаття 1944–1950 рр. Дисертація на здобуття наукового ступеня доктора історичних наук. Спеціальність: 07.00.01 – історія України; 03 Гуманітарні науки (032 – Історія та археологія), Ужгород, 2019, с. 275.
- 7 Лизанець Петро Миколайович. Питання про відновлення історичних назв населених пунктів Закарпаття та принципи їх написання // Матеріали науково-практичної конференції «Державне регулювання міжгетнічних відносин в Закарпатті», Ужгород, Патент, 1997, с. 107–108.
- 8 Зан Михайло Петрович. Перейменування та відновлення назв населених пунктів на Закарпатті 90-х років ХХ ст. як індикатор етнокультурних процесів // Науковий вісник Ужгородського університету, Серія: Історія, Вип. 8 / М-во освіти і науки України; Ужгород. нац. ун-т; Редкол.: І.О. Мандрик (голова редкол.), Д.Д. Данилюк (заст. голови оргкомітету конф.), С.О. Ганус, В.І. Фенич (редактори вісн.) та ін., Ужгород, Вид-во В. Падяка, 2003, с. 50–54.
- 9 Галай Оксана Богданівна. Українська урбанонімія Закарпаття в ХХ–ХХІ ст. Автореф. дис. на здобуття наук. ступеня канд. філол. наук: спец. 10.02.01 «Українська мова», Ужгород, Ужгородський національний університет, 2009, 17 с.
- 10 Відомчий архів Закарпатської ОДА, Ф. 195. Закарпатська обласна Рада народних депутатів, Оп. 14. Діловодство, Спр. VI сесія Закарпатської обласної Ради народних депутатів XXI скликання та рішення, прийняті сесією від 12 липня 1991 р., арк. 185.
- 11 Там само, Спр. XI сесія Закарпатської обласної Ради народних депутатів XXI скликання та рішення, прийняті сесією від 23 грудня 1992 р. Друге засідання, арк. 264–265.
- 12 Там само, Спр. II сесія Закарпатської обласної Ради народних депутатів XXII скликання та рішення, прийняті сесією від 06.04.95. Перше засідання, арк. 232–237.
- 13 Чучка Павло. Прізвища закарпатських українців: Історико-етимологічний словник, Львів, Світ, 2005, с. 29.
- 14 Відомчий архів Закарпатської ОДА, Ф. 195. Закарпатська обласна Рада народних депутатів, Оп. 14. Діловодство, Спр. VI сесія Закарпатської обласної Ради народних депутатів XXII скликання та рішення, прийняті сесією від 18 лютого 1997 р., арк. 122–123.
- 15 Постанова Верховної Ради України від 5 лютого 2004 року «Про перейменування села Діброва Тячівського району Закарпатської області» // Верховна Рада України. Законодавство України. URL: <https://zakon.rada.gov.ua/laws/show/1470-IV#Text> (дата звернення: 12.12.2020).
- 16 Постанова Верховної Ради України від 4 лютого 2016 року Про перейменування окремих населених пунктів та районів // Верховна Рада України. Законодавство України. URL: <https://zakon.rada.gov.ua/laws/show/984-19#Text> (дата звернення: 12.12.2020).
- 17 Нитка Василь. Чому не повернемо історичні назви своїм містам і селам? // Голос України. Дата оновлення: 06.04.2019. URL: <http://www.golos.com.ua/article/315672> (дата звернення: 12.12.2020).
- 18 Карпаторусинські поселення. Лішта сел и варошув у Централнуй Европі, де днешь бывавуть вадь даколы бывали Карпаторусины. Составитель: Михаил Капраль, Budapest, 2021, с. 54–77.
- 19 Шандор Федір. Голові Усть-Чорнянської селищної громади. Голові Вилоцької селищної громади Депутатське звернення // Facebook. Дата оновлення: 24.06.2022. URL: <https://www.facebook.com/profile.php?id=100063509179922> (дата звернення: 25.06.2022).

(Публікуєме в оригіналі – підкарпатським варіанті русинського языка.)

Главне місто Мадярьска было центром русиністікы

Од 15-го до 18-го септембра 2022-го року в Будапешті проходила меджінародна научна конференція під назвов *Світова русиністіка днесь: вопросы теорії і практикы*. Главне місто Мадярьска ся так на пару днів стало центром світової русиністікы.

Конференцію організував Русинський научный інштїтут імени академіка Антонія Годинкы, і была підпорена Мадярьсков владов, Вседержавным русиньскым самосправованєм, і Віров Гіріц, посланкынїв за Русинів в Парламенті Мадярьска.

Русины засідали в парламенті

Конференція мала дві пленарны засіданя. Перше, пятніцєве, проходило в просторах мадярьского парламенту, в Салі Калмана Селла. Мож сконштатовати, же то была історічна подія. Першый раз в нашій новодобій, але і історії обще можеме повісти, же Русинів, їх ученых і участників конференції привитав найвысшый законодавчій орган єдної з держав, де жыють Русины як міноріта. По привитаню **Віров Гіріц** слово дістав **Іштван Шімічко**, председа парламентной фракції Хрїстіаньско-демократічной народной партії, котрый був в минулости і міністром обраны. Шімічко сам має русиньске походжіня, і як у своїм приговорі сконштатовав, з великов радостїв бере участь на русиньскых подїях. Як далше увів, про каждого чоловіка є дуже важным формованя ідентічности, зато треба знати і мати в почливости своє корїня. председа парламентной фракції ся задумав і над тым, як ся подарило сохранити русинство, і кедь Русины не мають сполочну державу. Подля Шімічка, свою роль в захованю ідентіты мала, окрема інших факторів главні церьков, священници, але і тоты общества, котры до днешніх днів сохранияють русиньскый язык і культуру. Припомянув і слова Ференца Ракоція II, визначной історічной особы сполочной угорьской історії, котрый о Русинах повів, же суть *gens fidelissima* – найвірнішый народ.

Першый день засіданя

По приговорі представителя мадярьского парламенту приговорив ся участным і **Віктор Крамаренко**, председа Вседержавного русиньского самосправованя. Пак вже слово перевзяв професор **Михаїл Капраль**, директор Русиньского научного інштїтуту імени академіка Антонія Годинкы, котрый курто привитав участників і повів, який є ціль і задачі конференції, а єдночасно перевзяв модерованя робочого дня. Пак вже слідовало перше пленарне засіданя з рефератами. Першый день свої рефераты прочітали **Кветослава Копорова** (Словакія), **Валерій Падык** (Україна і Словакія), **Михал Павліч** (Словакія), **Юрій Шиповіч** (Україна), **Михайло Фейса**

(Сербія), **Юлія Дудашова** (Словакія), **Канаме Окано** (Японія), **Зденка Цітрякова** (Словакія) і **Томаш Калинич** (Україна, Чеська републіка, Шкотландія). По рефератах слідовала діскусія, по ній участны конференції мали забезпечену екскурзію по будові Парламенту Мадярьска.

Другый день ся засідало в будові самосправованя

Перед зачатком робочой части домашні вказали участным новозреконштрованы просторы, в котрых тот орган діє. Окрем канцеларьскых просторів, котры суть потребны про фунгованя самосправованя, в русиньскім будинку мають і інштїтут, котрый організував конференцію, русиньску бібліотеку, але і маленький музей. По екскурзії зачала робоча часть другого дня. Із рефератами ся представили **Маріанна Лявинець-Угрин** (Мадярьско), **Ержейбет Барань Комар** (Україна), **Кіра Задоя** (Німецько), котра заступала **Єлену Будовску** із США, **Михала Голубкова** (Словакія) і **Іріна Сюч-Ворінка** (Мадярьско). Заклучне слово по прочітаню рефератів і діскусії належало професорови Михаїлови Капралєви. Пак вже слідовав лем приговор **Віры Гіріц**, котра подяковала участным за участь на конференції і высловила радість, же так достойну подїю ся подарило зорганізувати Русинам в Мадярьску. Участны могли выслухати доведна пятнадцять рефератів, переважно з тематиков языка і історії языка, ці баданя діалектів, од представителїв старшой і молодшой генерації русиністів. Рефераты прозвучали в русиньскім, але і в словацькім, російськім і українськім языку.

Проходили і неформалны діскусії

Як самы організаторы выголосили, конференція не мала лем научный характер, але мала быти і платформов, жебы ся стрїгли представителї Русинів з окремых держав, жебы обговорили своє положіня і проблемы, котры мають, а таксамо представили візії далшой можной сполупрацы. І зато на конференцію были запрошены гості з русиньского середовиска, котры діють в рамках общественно-культурной або політичной области в своїх державах. Участь, окрема інших, взяли председа Світового Конгресу Русинів **Штефан Лявинець**, котрый є і посланцєм Вседержавного русиньского самосправованя в Мадярьску, державный секретарь Міністерства про людьскы і меншыновы права і

соціалний діалог Сербії **Олена Папуга**, ведуча *Сто-варишья Руска Бурса* з польських Горлиць **Наталія Малецька-Новак** ведно із віцешефом організації **Даміаном Трохановським**, председа Округлого стола Русинів Словакії і одночасно заступник члена Выбору про народностны меншыны і етнічны группы за русиньску народностну меншыну **Петро Штефаняк**, член Выбору про народностны меншыны і етнічны группы за русиньску народностну меншыну і одночасно член порадного органу пре-

зіденткы Словацькой републікы про народностны меншыны за Русинів **Петро Медвідь**, як і далшы гості.

В неформалных діскусіях, котры проходили попри конференції, притомны сконштатовали, же такы і подобны ініціативы як тота конференція суть потребны, жебы далше розвивати русиньскый рух в рамках Европы, і жебы схосновати наш сполочный потенціал в окремых державах на уровни междідержавной сполупрацы.

Петро МЕДВІДЬ, ЛЕМ.фм

Мукачовска єпархія буде мати нового блаженого Петра Павла Ороса

Папа римський Франціск у пятніцю, 5-го августа 2022-го року, прияв на авдієнції кардінала Марчелла Семераро, префекта Дікастерії в ділах визнання святих, почас котрой потвердив декреты, якы ся дотыкають беатіфікачных процесів.

Першым в тім списку є декрет визнання мучеництва Слугы Божого отця Петра Павла Ороса, русиньского священника Мукачовской грекокаатолицькой єпархії, котрый був і тайным єпископом.

Слуга Божый Петро Орос народив ся 14-го юла 1917-го року в селі Бірі, в Саболчско-сатмарьско-бережській жупі, на території днешнього Мадярьска, до родины грекокатолицького священника Івана Ороса. По смерті отця ведно з мамов і братом Іваном побрали ся у 1919-ім році на Підкарпатя, де жив дід, таксамо грекокатолицький священник, Кіріл Раковський. Як девятьрочный зістав цалком сиротов, кедьже му вмерла і мама. У 1937-ім році вступив до Ужгородьской духовной семінарії і 28-го юна 1942-го року прияв рукоположіня на священника. Свою душпастырську роботу почав як помічний священник в селі Великы Комяты. Владыка Теодор Ромжа, котрый відів огорожіня про Грекокатолицьку церьков по приході Червеной армады і комуністів на Підкарпатя, подля свідоцтва отця Стефана Бендаса, 19-го децембра 1944-го року рукоположив тайно отця Петра Ороса на єпископа. У 1946-ім році був призначений на вольну парохію до села Білки. У 1948-ім році містны органы влады намагали ся вшеліякыма способами, тискамы пересвідчіти отця Петра Ороса, жебы перешов на православіє. Кедьже він не хотів, подобно як іншым священникам, котры зістали вірны Грекокатолицькій церькви, забранили му штатны органы выконувати душпастырську роботу. **Отець Орос продовжовав у душпастырстві, но уж в підземній церькви, і тайно обслуговав із своїма сполубратами священниками грекокатолицьких вірників Іршавціны і Виноградівціны.**

На початку 1953-го року го заарештовали і посла-

ли до Ужгорода, до „розслідчого ізолятора КГБ“, де був у арешті понад два тыждні. В літі 1953-го року знова пробовали отця Ороса арештовати, но подарило ся му втечі. День перед праздником Успенія Пресвятой Богородіці за юліаньскым календарём, 27-го августа 1953-го року, в селі Великы Комяты за участи великого множества людей служыв Божествену літургію, сповідав і причащав людей. Того самого дня пішов пішо на желізничный штаціон в селі Сільце. Ту го хопив міліціонарь і вів го напрямом на село Зарічя. **Недалеко креста го забив двома стрілами.** Тіло отця Ороса одвезли до Іршавского шпыталю, по дакількох днях го закопали меджі терня коло села Камяньске. Пізніше остаткы выкопали робітници міліції і КГБ, і вывезли в напрямі на Іршаву.

Довгих 39 років ніхто не знав місце, де є похований отець Орос. Аж по легалізації Грекокатолицькой церькви нашли ся свідкове, котры під присягов розповіли правдиву історію тых трагічных днів. 28-го юла 1992-го року колишній начальник „ізолятора Іршавского Районного одділіня выконавчой службы“ був согласный дати свідоцтво і вказав гараж міліції, де было закопане тіло. По екзумації і выконаній експертізі 23-го августа 1992-го року одбыло ся перепохованя остатків отця Петра Ороса із вшыткыма честованямы, якы му належали. **На другый день одбыв ся архієрейскый погріб. Мощі отця Ороса поклали до каплічкы, котра є близко церькви у селі Білки.** 12-го августа 2012-го року в роднім селі отця Ороса была одкрыта памятна табла тому великому сынови Підкарпатя. Памятну таблу ведно ініціювали Українське вседержавне самосправованя і Русиньске вседержавне самосправованя в Мадярьску.

ПОЗДРАВЛІНЯ РУСИНІВ на рік 2022 ч. 5

Дорогы читателі,

зачну словами єдного популярного америцького серіалу: Зима ся ближить! Можеме то відіти такої гев за облаком. Додж лем цяпкать і цяпкать, теплоты тридцять плус ся здають як (неприємный) сон а природа ся рихтує на зимушне спяня. Літо ся просто скончіло а звекшуючий ся холод жене людей до хыж, де є так... но, надію ся, же тепло. В такій погоді звычайно хыбить уж лем добре читаня, таке, што бы погладило душу і дало нас до спокою... а тото ся праві несе! В нашім Поздравліню Русинів мать простор автор поезії котрый несе добру новину – **Юрко Харитун**, до бібліографічної родини котрого ся народила утішена книжочка. Подобні радостну новину мать і **Іван Боднар**, затоже ёго Стары руцаньскы пригоды zdobyли Ціну Александра Павловича за русиньску літратуру. При тій нагоді Вам приношам куртый погляд на умелецькы спрацованы автентічны пригоды з Руського з малов укажков. Гратулуеме! А наконець, за серце Вас хоплять дві балады **Анны Галгашовой** із зборника русиньской народной поезії Тернёва ружа.

Пяте Поздравління Русинів на рік 2022 так презентує успіхы русиньскых писателів нелем в області выдаваня новых книжок, але і їх оцінёваня. Маєме надій, же холем єдного з Вас – читателів рубріка приведе на писательскый пішник... а хто знать, може ся з Вашов творчостев стрітима на тых самых сторінках. Стачіть ся приголосити до Літературного конкурзу Марії Мальцовской і загнати Ваши орігіналны, дотеперь нигде неопублікованы творы.

Мгр. Михал ПАВЛІЧ, ПгД., Центр языків і культур народностных меншын – Інштитуту русиньского языка і культуры ПУ

Юрко Харитун

Мої пішники

Мої віршы такы...

Про мене віршы
як кости
Обгрызу їх дочіста
і граю ся з нима як псик
Без них мені
як без клубятка мацці
Колись і помотаны
но все штось найду у них
Про мене віршы
такы...
але то мусиш повісти ты

Люблять ся мені

Мені люблять ся
Індіанкы
Ветнамкы
Чінянкы
і не знаю іщі якы
Не фарба робить чоловіка
але ёго душа

Такы і віршы
можуть быти
довгы, курты, рімованы
І НЕ ЗНАЮ ІЩІ ЯКЫ
Главне – што є у них

Слова

Рімують ся і вулгарізмы
а я не люблю такы слова
Любозвучны
мілозвучны
парада у віршах
Таков парадов
і слово любов
А як потішить
мамка
колыска
і спів над нёв
Брыдкы слова
выметь мітлов

Роса

Сердце моє – молоток коваля
Рука – стара коса тупа

Наклепана буде косити
лем коли роса
І ты така
коли прибігнеш до мене боса
Душа моя
колись як стріха
по якій не доджік
а слыза стікать

Доброта

Мамко,
хто мені наварить ризанкы
што я любив?
Такы як рыбки із нашой рікы
якы я ловив
Мамко,
таку доброту можете лем вы
Іщі так
фасолю колочену
Не збавлю ся таких снів
Доброту вашу
хочу вложыти до віршів
про діточкы і внуки

І мышкы потішать ся

Сиджу під стріхов
Мачка на колінах
погладжу її
і тішу ся
як кебы хтось грав мені
Поки буде грати
выгравати
таку радість і мышкы
будуть мати
якы учують і вылізуть з діры

Мушля

Хтось на ухо мушлю кладе
і чує море
А хтось нашу ріку
яка гучить і тече долинов
аж сердце поре
Ани море ани ріка
то кров так тече
у нашім тілі по жылах
Прикладую мушлю на ухо

не знаю што чую
але даю ся до писаня
Значить же іщі жыю я
Дякую тобі, мушлє моя

Признати ся мушу

Не літам високо
не літам далеко
приємно кружыти
над своїм гніздом
Під Бескідом
на бережку жалі
пишу о любви
Як потя щастливый
вертам ся домів

Тішить мене

Над Татров ся блискать
І у нас так громы били не раз
Родічі мене учіли
не мати із того страх
Лем перехрестити ся

і высловы - прекрасны слова:
Святъ, Господічку, святъ!
Тішить мене
коли і діточкы так говорять

Колись і днесь

Часто роздумую над тым
як было колись
і як є днесь
Чую як наш ліс гучить
як ріка співають
і як колыска скрипить
Голос дзвонів над селом
чую як колись
Припоминають мені сімфонію
Сметанову Вылтаву
яку люблю послухати і днесь

*(Юрко Харитун: Мої пішники.
Пряшів: Академія русиньской
културы в СР, 2022)*

Михал Павліч

Іван Боднар – Стары рущаньскы пригоды

Мож повісти, же в історії каждого народа ест-вують вызначны історічны події, котры із собов несуть травмы. В рамках історії лемківскых Русинів так фігурує Акція Вісла, на северовыході Словакії екзістує менше трагічна, но засягнутыма жытелями глибоко переживана крива, котру сімболізує Старина. Ставаня водного діла собі выжадало переселеня і зрівнана зо землєв семох русиньскых сел, меджі іншыма і Остружніці, з котрой походить оцінёваний поет Юрко Харитун, і Руського, котре є звязане із жывотами авторів повідань книги Івана Боднара.

Стары рущаньскы пригоды суть почіном вітця і сына, зозбераны пригоды жытелів села Руське, при котрім собі такой спомянеме на методу оральной історії. **Пригоды** з легкостєв і сімпатічно описують містный колоріт, сельскый ум, містны повіры ці традиції і звычаї при роботі (доповнены о може уже архаічну термінологію), або ай сельскых фіглярів, героїв або і швіндлярів ці злодіїв. Розповіджены пригоды суть розмаїтов мозаїков, котра вытваряють пластічний опис жывота на русиньскім селі, вірный образ, но містами

може і прибарвене чаровне село Руське. Не йде о выпоінтованый твір фікції, ани розсягом великы тексты. Но они інтересным способом оживлюють уж безнадійно страчений час і простор, над котрым ся розолляла вода. Фіналный текст – повіданя з назвов **Послідня жытелька** сімболічно творить зачаток конца водной гати.

Подобно як і далшы выдаваны книжки русиньской літературы в сучасности, і **Стары рущаньскы пригоды** суть властно двойвыданєм, але не двойграфічным в русиньскім языку, але двойязычным, то значить, половина книжки є в словеньскім і друга в русиньскім языку – в азбуці. Книжка ся так одкрывать і про шырший читательскый округ, затоже ся не обмеджує лем на читателів-Русинів.

В заключіню нашого куртого тексту хочеме Иванови Боднарови погратуловати к оцініню книжки **Цінов Александра Павловича за оригінальный умелецькый твір в русиньскім языку** і высловлюєме надій, же з Боднаровов творчостєв ся будуть читателі стрічати і в будучности. Была бы то велика шкода, кебы ні.

Стары руцаньскы прыгоды Послідя жытелька

Руське, валал меджі горами, зажив протягом своєї екзистенції розмаїты часы – спокійны і тяжкы. Жытелі Руського прожыли біду і голод, мусли ся спамятати із двох воен, котры ся валалом перегнали і рядні го знічили. Но заникнутя села предсі лем не чекали. О выселіню села ся вирішыло в спокійных часох, кедь ся уже віділо, же му ніч не грозить. Высокы функціонарі вирішыли выстяговати сім русиньскых сел в цілій стариньській долині, враховано Руського. Прічінов мало быти поставліня водной гати на питну воду – Старины. Што собі думают жытелі тых сел, того уряды не інтересовало. Люде круте рішїня прияли, не мали на выбер. Зачали свої валалы опуццати. Розоберали свої хыжы, одвозили ставебный матеріал і вшыток маєток. Было вирішено і о буряню вшыткых верейных будов, школ, склепів, культурных домів і церьквей. По Руськім і по остатніх выселеных валалох не мала зістати нияка памнятка. Наконець зістала стояти в Руськім лем гаєнка і послідній родинный дім.

Ян і ёго жена Маря, по дідови звана Хабальчина, бывали на вышнім концю валала. Наперек вшыткому, што ся около них робило, вирішыли зістати. Не хотіли опустити дім, в котрім пережыли фалат свого жывота. Были уже пензісты. Тяжко бы собі звикали на живот на новім місті, дагде в містьскім панелаку. Хыбив бы їм двір, загорода і знамы люде. Навеце, Маря мала по переконаній пораждці проблем з орьентаціёв. І в сусідній Великій Полянї зістало жыти дакілько родин. Уряды были їх рїшінём несподіваны. Выселіня плановали скончіти до вісемдесятыяго року і жытелі, котры ся не одстіговали, рушили їх замір. Людей, коры зістали, пересвідчовали, нукали їм кварталі в місті. Кедь то не помогло, притвердили. Быв зрушений регуларный автобусовый спой із і до міста і одставлена електрика. Ани тото не принутило Яна і Марю одыйти. Порадили собі. Надале газдовали на своїм полю і в своїй загороді, на дворі тримали куркы, а кедь было треба, Маря напекла хліба. Дівкы – Анна і Маря і сынове – Штефан і Ян, знамыма называный Іван, жыли

в місті. За родічами до Руського доходили, привозили їм вшытко, што потребовали. Помогли їм при роботах на полю і около дому.

Рік по выстягованю умер Ян. Погріб мав в Снинї, бо на руцаньскім цінтерю ся уже не сміло ховати. Маря наперек тому зістала в своїй хыжі. Анна і Іван за нёв і надале регуларно приходили. Кедь дашто потребовала, Іван ей то привіз автом. Ани тото не было все прости. Уряды їм живот будьякым способом стяжовали. Вступ до охранныго пасма був можный лем з поволенков выданов містным народным выбором в Стаціні. Кедь выдали тых поволенок пять, далшы уже не выдавали, лем ознамили, же поволенок вже не є. Жадатель мав смолу, мав прийти на далшыи день. Івана нераз їмав стаціньскый містный шандарь на моторці аж до Руського, наперек тому, же го добрі познав і знав, чом там іде. Може якраз зато го контролёвав, ці має поволенку.

– Чом есь не заставив? – крічав на Івана, кедь го достиг коло студника Пуд грабом.

– Не позерам ся дозяду, позерам на ямы на пути, – бранив ся Іван.

Раз Івана „безпечаці“ пристигли в Руськім без поволенкы. Ішов ід матери копати бандуркы. Мусив заплатити покуту.

Наперек вшыткым обмеждїням у Марі все дашто був. Найчастїше ся у нёй заставили лісны робітници. До работы їх возив автобус. В зимі ся у Марі зогріли, сушыли собі мокре облечїня. Кедь падало, пересиділи у нёй коло карет і цілыи день. Привезли ей дрыва на вгень і порїзали го на клаты. Поколов їх сын. В літі ходили до ліса лісны робітничкы. Заставили ся у нёй, даколи ей принесли закуп. В зимі, кедь нападав великый сніг, зістала драга непрояздна. І два-три тыждні ся на вышній конець не дало дістати. Мари то не вадило, засобу дров на вгень мала дость велику. Зато, же електрика была одпоєна, світила собі свічками.

Даколи ся у нёй обявили нагодны навщівници, люде, котры зберали грибы, або туристы. Директорови основной школы, котрый пришов зберати грибы, помагала, кедь впав до

напівзасыпаной студні. В літі собі на ей дворі поставила стан родина аж з Баньскої Бістріці. Стих, котрый о ній написали, ся декламовав і в „телевізній хвільці поезії“. Бісїдовали о ній вшиткы люде, котры і знали.

Кедь ся ей дакотры люде звідовали, ці ся не чує сама, одповідала:

– Не ем сама, суть ту зо мнов потята.

Около ей дому кружыла велика хмара ластівок. Было їх чей дакілько сто або выше сто. Цілый Марин дім був облїплений гніздами ластівок. По збурянню вшиткых будов і домів в Руськім ся ластівки з цілого валалу настягвали ід Мари. Сполочность ей робив і пес Бояр. Быв уж другый, того першого ей втравив якыйсь нежычливець.

Уряды ся не змірили з тым, же ся Маря з валалу не выстїговала. Псіхічно ей тірали, перед верейностєв ей очорнєвали і шпінили, выдумовали собі о ній зъявны неправды. Урядник, повірений выселєванем, про новинкы твердив, же баба Маря голодує і ним повірений робітник ей носить їдло. Перед телевізным штабом, котрый ю пришов нафїлмовати, ей давав до руки паліцю, котров ся підперала, жебы го нєв перед камеров била. Так хотїв доказати, же є в планім псіхічнім розположіню.

– Чом бы ем тя била, ный тя зима бє, я тя бити не буду! – спокійно одповіла Маря.

Подобні о ній написала редакторка даякых новинок. В своїй статї твердила, же Маря голодує, хоць ся сама пересвідчіла, же Маря бідов не терпить.

Наконець Маря вирішила, же ся перестїгує до міста. Уже были выстїгованы і послїдні жытелї Великой Поляны. Настав але проблем з быванєм. Першый кварталь Маря одмітла, далшый ей ображены окресны функціонарі не хотїли придїлити. Кедь была дівка Анна жада-ти о кварталь, окресный председа партії ся на ню выкрїчав. Грозив ей тым, же матїрь выстїгують до гаражу. Анна ся не здавала. Ішла вы-ше. Оголосила ся у крайского таємника, буду-чого президента. Словацькой републікы, Рудо-лфа Шустера. По ёго засягу народный выбор в Снині на другый день придїлив Мари кварталь. Иван з Аннов приправлєвали кварталь на быва-ня. Маря іщі хотїла зістати єдне літо в своїй хыжі в Руськім. Сынове поступно перевозили до кварталю материны особны річі, облечїня,

гратя. Иван із братом Штефаном ся добісїдова-ли, же на другый день пообіді підуть за буто-ром. Авто забезпечів шовгор Душан. Но рано їм ознамили, же мати вмерла. Вмерла вечур, курто по тім, кедь од нєй одышли дівка і сын. Рано пришов до Руського автобус з лісными ро-бітниками. Хлопи ся выбрали до ліса. Шофер ся ішов налити воды ід студника. Двері до пивніці были кус одхылены. Кедь ся попозерав днука, нашов там мертву Марю. Вмерла, кедь чїстила ворїшець. З Великой Поляны урядници якраз стїговали послїдні родини. Стары люде были в планім здравотнім ставі, зато была притомна і докторка із Снины. Докторку такой заклика-ли ід Мари. Зробила обглядку тіла і уже могла лем конштатовати смерть. Маря в тот день мала 66 років і девять місяців. Так, як і ей муж Ян, і Маря є похована на сниньскім цїнтерю.

По ей смерти зять Душан одвіз Бояра до Снины. Дав го знамому. Тот бывав недалеко цїнтеря. Но нелем люде были смутны. Єдного дня нашли лежати вірного Бояра на Маринім гробі. Чудовали ся, як в незнамім місті міг най-ти гріб своєї панї. Марины діти поодвозили з Руського послїдні річі. Кедь мали проблем з поволєнков на вступ до Руського, Анна зась об-ходила уряды. Містны урядници ся выгваряли на окресных гігієніків. Анна ся не дала одбити. Пішла на гігієнічну станіцю. Там ся стрїтила з векшым похоплїнєм. Директор знав Марину судьбу. Повів Анні, же кебы было веце таких людей, як была ей мати, валалы Звала і Руське ся нияк раз не мусили стїговати.

Опущений дім Марї зістав іщі даякый час сто-яти. Роздумовало ся, же буде служыти про ліс-ных робітників або полєвників. За ёго захованя про ластівки ся пригваряв і знамый сниньскый орнітолог. Колись в осени, кедь до Руського ходило мало людей, дім збуряли. Не знати, ці то было мотивоване урядниками, або то была ініціатива даякых „горливців“. З одходом Марї, послїднєй жытелькы, валал Руське перестав дефінітївно екзістовати.

Розповіла Анна Лемпелєва-Крішкова і Ян Крішка в році 2021.

(Іван Боднар: Стары руцаньскы пригоды. Пряшів: ОЗ Колысочка – Kolíska, 2021)

Анна Галгашова

Тернёва ружа

В горах, під Бескідом, все ся тяжко жыло,
Де ся камінь родив, там хліба не было.
Під тыма горами Русины бывали,
Тяжку долю, вера, цілый живот мали.

Школы щі не были, жебы ся учили,
Лем на паньскім, бідны, на полю робили.
Мотыку і топіс до рук їм давали,
А самы в каштелёх радованкы мали.

Щі за Ференц-Ёжка Мадяре владіли,
А што ліпша земля, грофове засіли.
Людей утискали, маєткы забрали,
А лісы і луку дозерати дали.

Із молодых хлопців гайників зробили,
Жебы лісы, поля, і луку стражили.
Тяжко было тогды людём газдовати,
Бо не могли сміло і травы нажати.

Гайник ціфрований лем на коню ходив,
А кедь не дозерав, та дівчата зводив.
Ой, не една, не дві за ним позерали,
Вечур коло плота на нёго чекали.

Лем една дівочка го не вызерала,
Бо вона щі на свадьбу і не подумала.
Зато Штефанови міцно ся любила,
Бо вона, де лем могла, там го обходила.

Терка была шувна, найгарша в валалі,
Не раз ся д-ній, вера, хлопці добивали.
Робота ей, як вгень, у руках горіла,
Зато ей краса, як сонце світила.

Бывала за гатёв, у малім будинку,
А з млакы носила домів жовту глинку.
Спары затыкала і землю мастила,
Ой, барз ся паробкам дівочка любила.

Штефан вже позводив ушыткы дівчата,
Лем една Терезка не была начата.
Бідно жыла з няньком, мамкы уж не мала,
Жебы ей в роботі дома помагала.

Од рана до ночі дома ся звивала,
А коло роботы красно сі співала.
Скоро наварила і шматя попрала,
Худобу за росы на поле выгнала.

Біда превелика, пашковы вже голы,
Де лем бы напасти тоты нашы волы?
Піду я за рана травіці нажати,
Буде што худобі до жолоба дати.

Як Терка повіла, так ай ізробила,
А рано за росы з дому выходила.
Травіцю під лісом шатовала жати,
Кедь хотіла скоро повну зайду мати.

Рано щі лем люде з постели вставали,
Як віділи Терку, тай ся чудовали.
Де лем могла дівка той травы нажати?
Підтыли гайника, бы йшов вартовати.

Штефан ся на Терку цілу ніч рихтує,
Же ей коло ліса зрана довартує.
Ці то мож на паньскім траву выжынати?
Вера, ся му мусить днесь рано оддати.

Щі місячок світив, но вже ся сіріло,
Як дівча із серьпом під ліс выходило.
Вышла на бережок і ся позерала,
Де бы сі найліпшой травіці нажала.

Недалеко цвила і тернёва ружа,
За нёв увіділа незнамого мужа.
Поку ся од страху, бідна, спамнятала,
Під тернём у траві із хлопом лежала.

Дарьмо вже Терезка, дарьмо вже плакала,
Бо за зайду травы свій вінок продала.
Кебы лем продала, навсе го стратила,
Што сі теперь почне, радше бы не жыла.

Ходить задумана, дале зайды носить,
Чом есь така смутна, каждый ся ей просить.
Што ся дівці стало, же ся так змінила,
Кедь дотеперь співом валал веселила.

Но одповідь од нёй не могли дістати,
Бо Терка мусила в полю присягати.
Же не повість нігда за свій гріх нікому,
Лем так могла іти із поля до дому.

Вшеліякы думы у голові мала,
Як ей брїх наростав, тай ся звязовала.
Бы ніхто не збачів, што вона поробила,
Дітину принесе, а щі не любила.

Ани-м не дівчіла, ани-м неоддата,
А уж моя доля навікы проклята.
Ці я ся зродила в недобру годину,
Же мушу терпіти таку тяжку вину.

Гнівать ся на себе, гірше на Штефана,
Як ся то народить, та буде выгнана.
Бо жена без мужа породить нечистой,
Де ся лем задіе у тій горі пустій?

А што день, то веце розум баламутить,
Тяженькый гріх зась лем гріх зробити нутить.
Щі лем Терка дітя в своїм брісі носить.
А вже смерть про нёго у Господа просить.

Довго не тримало, Терка породила,
Не єдной, але двой діточок повила.
Не могла ся на них ани позерати,
Шатовала в лісі діти поховати.

Не верьху під скалов яму wygrабала,
А щі на їх тїлка скалу закачала.
Там діточки мали навікы лежати,
А за гріх Терезкы не мало ся знати.

Аж раз ся за тото ушыткы дізнали,
Як панове в лісі на звірь полёвали,
Пустили своїх псів лишкы наганяти,
Лемже їх учули чудно скувінчати.

І чіжмы підрали і ся побдерали,
Покры ся аж на верьх під скалу дістали.
А там своїм очам не могли вірити,
Бо псы із під скалы wygrабали діти.

Вхабили панове діти на тім місті,
А самы втікали шандарім повісти.
Няй глядають жену, што діти забила,
Што ей донутило, же тото зробила?

Валал невеликый, проглідка перешла,
І так ся наконець грішна Терка нашла.
Руку ей звязали, валалом водили,
Жебы такого уж жены не зробили.

Як ся нёй просили, з кым то ізробила,
Од страху і ганьбы бісїду стратила.
Уж ніч не повіла, што ся ей просили,
Та й на штири рокы Терку одсудили.

Сидїла в арешті, помалы халїла,
То ей совість удень, і вночі трапила.
Перед собов видить свої малы діти,
Уж не може довше на тім світі жыти.

Муры голы, гладкы, як висока скала,
Што під ню у лісі діти поховала.
Што ся то лем стало, то не розумїла,
Наконець в арешті міцно похворїла.

Загнали ей домів, до родного краю,
Же ся уж ей рочки на дні почітають.
Ой, велё вже ночей Терезка не спала,
Чом таку присягу Штефанови дала?

Перед смертєв Терка уж ани не їла,
А наконець людём вшытко выповїла.
Як мусила Штефанови присягу давати,
Же по нїм потомок не сміє зістати.

Послідню годину перед єї смертєв,
Нїс ся смутный голос долов цілов кертєв.
Як сі донедавна весело співала,
Так теперь жалостно, коли умерала.

- Бескїде, Бескїде, в тобі сива скала,
Яку же-сь мі, мамко, долю обіцяла.
Малу-сь ня вхабила на тім біднім світі,
А теперь молода йду під землю гнити.

Вітор голос несе, аж за сердце стискать,
Під лісом квїч квїчіть, каня смутно пискать.
А потім лем дзвоны смутно задзвонили,
Як мертву Терезку з дому выносили.

Штефанови дали про ню грїб копати,
Бы го потім могли з валалу выгнати.
А на путь до світа, так го проклянали,
Бы по нїм потомкы нїгда не зістали.

Клятба ся сповнила у нашім валалї,
Бо по Штефанови діти не зістали.
Аж по році вчули, што ся із ним стало.
Же го в Штатах в майні вугля засыпало.

До рока і до дня было му суджене,
І так мав про Терку сердце ізмучене.
А Терці на гробі ружа розцвївала,
Нихто ей не садив, сама ся засьяла.

Материна клятба

Стало ся то давно, перед сто роками,
покры люде кляли, жыли з ворожками.
Днесь бы ся то вера уж не мало стати,
жебы могла мати дітину прокляти,
зато я вам хочу тот припад повісти,
што ся то раз стало на недобрім місті.

Там збоку, під лісом шырым, зелененькым
жыла бідна вдова з дівчатком маленькым.
Жыла, жыла, претяженько бїдовала,
бы сі свою сиротоньку виховала.

За тым лісам у кошарі вівці былі,
а в колибі бача із Іванком жылі.

Бідна вдова там ходила овечкы доіти,
жебы могла себе й дівчатко вжывити.
Сікником покрылі хыжку деревяну
а у хыжці мали судину глиняну.
Од рана при хыжці джавот веселенькый –
там ся бавлять Анька і хлопец маленькый.

Барз сі розумілі тоты малы діти,
едно без другога не хотіло быти.
Мати од маленька діти розганяла,
дівці богатаго мужа рихтовала.
Коло воды росла зелена травіця,
із Анькы ся стала шумна молодіця.

У цілім валалі не было ей пары,
еї чіста душа, як небо без хмары.
Парібци зачали до них приходити,
дівка не хотіла з никым говорити,
бо вна вже любила од мала єдного:
- Не піду, мамочко, нігда за другога!

А Іванко, бідный, лем овечкы пасе,
Анька му потайно все їсти однесе.
Хлопец то був шумный, не было му хыбы,
а як мав кус часу та ішов на рыбы.
Кедь сі рыбки імав, вода му гучала,
якбы му недобру раду повідала.

Ідй ты, Іванку, далеко до світа,
охаб Аньку дома, ваша любов сліпа.
- Не дасть мати Аньку, кедь ты ніч не маеш,
скорше свою дівку навікы прокляе.
Роздумуе Іван, што мае робити,
тяжко бы му было мілу охабити.

Пасе вівці дале, на піщалю пискать,
смутну співаночку, што за сердце стискать.
- Пасу вівці, пасу, бо іх пасти мушу,
не дай затратити, Боже, мілой душу,
дай матери розум, жебы нас не лала,
бы ся еї клятба під землю пропала.

По полю, попід ліс, потятка літають
і вни днесь смутненьку співанку співаюць.
Зачали овечкы в кошарі блячати,
якбы ся штось страшне днеська мало стати.
Долов у валалі гостину ладили,
жебы сі Русальны святкы славили.

Як зачали дзвоны до службы дзвонити,
мусили роботу вшыткы охабити.

Вдова на гостину міцно ся рихтуе,
дівку перед себе до церькви пакуе.
Покры мати вшытко у хыжі зробила,
дівка до довжанкы їсти ізладила,

Ку мілому бігла і ся не вбзерала
а мати прескоро до церькви втікала.
У церькви хотіла впереді стояти,
бы ся могла в своїй дівці покохати.
Але мати в церькви дівку не віділа,
клякла на коліна, і так ся молила.

- Бодай есь ся, дівко, навікы пропала,
кедь есь із Іваном, бы-сь на камінь стала.
Нараз загырміло, зачало блискати,
ішли люде з церькви на вон позерати,
таке чудо доты нігда не зазнали,
якбы ся дві хмары над нима урвали.

А вдова лем клякне, бо вна ніч не чуе,
а коло розпятыя руки заламуе.
Дзвоны выдзвоняли, люде позерали,
як вівчарь і вівці спід ліса втікали.
Што лем ся страшного в лісі могло стати,
чекали, што буде Іван повідати.

Бачів сын у страху не міг ніч повісти,
глядав бідну вдову, де бы сі міг сісти.
А як ей увідів, подавав ей руки,
аж тогды він збачів, якы мае муку:
цалком постаріла за єдну годину,
бо за тоту клятбу несла вшытку вину.

Іван іщі кліче вшыткых позерати,
ці бы дахто не знав дашто спомагати:
- Бо там, на тім місті, камінём ся стала
як мі із довжанкы їсти подавала.
Не вмерла дівочка, в полю скаменіла,
а з довжанкы в руках вода выходила.

Выслухав Бог матір і її проклятя,
ніч ей не зістало, лем із дівкы шматя.
Про тото заклятя было велё болю,
бо пан Біг все повнить материну волю.
З того бы сі мали вшыткы приклад брати,
же не треба нігда своїм дітём лати.

*(Анна Галґашова: Тернёва ружа. Из книжки
ед. Анны Плішковой: Тернёва ружа. Сборник
русиньской народной поэзии. Пряхів: Русиньска
оброда, 2002)*

Выголошений 9. Літературный конкурз Марії Мальцовской

Од 2. септембра до 25. новембра 2022 Сполук русиньских писателів Словеньска у сполупраці з Академієв русиньской културы в СР і Інштїтутом русиньского языка і културы Пряшівской універзїты в Пряшові выписує **9. рочник Літературного конкурзу Марії Мальцовской** на найліпшы творы в области поезїї, прозы, есеїв і драмы в літературнім русиньскім языку. Оригіналны літературны творы в розсягу од 10 до 20 сторінок тексту (дотеперь нигде непублікованы) може послати на адресу: **ПгДр. Кветослава Копорова, ПгД., Інштїтут русиньского языка і културы ПУ, 17. новембра ч. 15, 080 01 Пряшів** каждый автор од 18. року свого віку, жыючий в Словацькій републіці. Конкурз є анонімный, то значить, же каждый автор до обалкы з літературным твором вложить іщі єдну заліплєну обалку, в якій буде єго мєно, призвиско, адреса і фотопортрет. Обалкы з мєнами і призвисками будуть розбалєны председом пороты по оцінїню конкурзу (буде го оцінєвати тройчлєнна порота). Выголошїня выслідків конкурзу ся одбуде в половині децембра 2022. Найліпшы роботы, выбраны одборнов поротов, будуть наслідно оцінєны і опублікованы в часописі Русин.

Приправный выбор літературного конкурзу

Мгр. Михал ПАВЛІЧ, ПгД., Інштїтут русиньского языка і културы Центра языків і култур народностных меншын Пряшівской універзїты в Пряшові, Словакія

Зборник Штефана СМОЛЕЯ – Мамко моя, чом праві я?

Штефан Смолей належить до старшой генерації русиньских писателів Словакії, котра была літературно активна в періоді по році 1989, в третім русиньскім народнім возроджіню. Автор є знамый і оцінєваний передовшыткым як прозаїк (**Премія Александра Духновича за русиньску літературу**, в єго припадї за прозу *Бурї над Бєскидами* в р. 2014), но в послїдніх роках давать перевагу тыж поетичній і байкарській творчости (напр. стихи *Бїлы маргареткы*, 2015, *Мамко наша*, 2016; байкы у зборнику *Чудный світ*, 2011).

Теперїшня публікація **Мамко моя, чом праві я?**, є зборником короткой прозы і 32. єго книжков у русиньскім языку. Як є авторовым звыком, дїя проходить в минулости в домашнім середовиску на русиньскім селї меджі простыма людми. Окремы тексты суть взаємно звязаны централнов постатєв Андрїя Гороха і єго пригодами в дїтинстві. Сполочным мотивом ці кулміначным пунктом тых текстів є але Андрїєве похворїня ці зранїня, котре здобуде.

На єднім боці так мож критіковати повторєваня єднакого мотиву, на другім боці мож оцінити то, же Смолей го выужывать на то, жебы фарбисто ілустровав жывот селян в минулости. В

книзі ся находять описы русиньской културы, напр. народного лічїня ці запоїня „сільского розуму“ (причїм автор го не ідеалїзує, але вказує тыж на єго наслідкы), святочных звыків, дїтських гер, але і роботы (пастырство в дїтинстві, дереворубство у дорослім віці).

Єдночасно Смолей вказує і на наслідкы і можны комплікації нелегкого жывота карпатьских Русинів, котры в минулости жыли самостачным жывотом – скоро вшытко потребне собі выробили або здобыли вдяка домашнім звірятам, выпестовали ці назберали у лісі. Одношїня домашніх звірят і селян было сімболічне, домашні звірята злегшовали роботу на полю, выпестованы плоды служыли на обжыву про людей, як і звірів, котры дале помагали на полю. В припадї, кєдь ся селянам стратила хуба ці дїтина потребовала лічїня, зразу є огрожена обжыва родины і выникать нерїшытельный ествуючий проблем.

Мамко моя, чом праві я? зато може быти інтереснов публікацієв про шыроку шкалу читателів русиньской літературы, од простых читателів аж по штудентів, учїтелів і науковців, котры ся занимають літературов.

Твори Євгенія Фенцика ся дістають ку читателям

В тых днях приходить к читателям нова публікація з Видавательства Пряшівской універзیتی в рамках серії Русиньска класіка.

Тандем літературознателів із Інштітуту русиньского языка і культуры Пряшівской універзیتی в Пряшові, **Валерій Падык і Михал Павліч**, по двох публікаціях, в яких пошоровали твори Анатолія Кралицького, і выбері пес з репертоара Театра Александра Духновіча, одкрывають про сучасного читателя далшу визначну русиньску особность і ёго творчу дідовизну.

Три найважнішы творы

Книга з назвов *Євгеній Фенцик. Творы* приносить три цілы, комплетны творы того визначного священика, поета, прозаіка, драматіка і публіцисты другой половины 19-го столітя. Но подля редакторів виданя, иде о три найважнішы літературны творы, із веце як двасто, котры Фенцик почас свого жывота написав.

Книга ёго выбратых творів обягує повісти *Нищіє духом* і *Учитель-Неборак*, як і драму з назвов *Покореніє Ужгорода*. Ёго творы, незаслужено забыты, як пишуть редакторы новой публікації, так ся днесь холем часточно вертають ку русиньскому читателёви.


В книзі *Євгеній Фенцик. Творы* найдеме і доста шыроку а глубоко оброблену біографію Фенцика, котру знова приготовив, як і в попередніх виданях Кралицького, Валерій Падык. Таксамо 400-сторінкова публікація, котрой виданя підпорив і Фонд на підпору культуры народностных меншын, обягує і богатый додаток з ілюстраціями.

Падык з Павлічом так знова сягли по далším покладі русиньской літературы, котрый і вдяка українізації в минулім столітю зіставав мімо інтересу, і приношають тот поклад „очіщенный од пороху“ днешнёму читателёви.

Книжка, як повів єден із редакторів, Валерій Падык, в тых днях має вказати ся друком, но уж теперь шырокий круг заінтересованых може собі ей цілу прочітати і на сайті Пряшівской універзیتی, бо авторы проекту хотять, жебы ся дістала ку што найвекшому числу читателів.

Євгеній Фенцик

Євгеній Фенцик (1844 – 1903) був родаком із села Мартінка на Підкарпатю. Штудовав на гімназії в Ужгороді і Сату-Маре. Потім абсолвовав



богословску факулту на універзیتی у Відню. Якраз там, в главнім місті монархії запоїв ся Фенцик до патріотічных кружків славянської штудентьской молодежи. На священика був рукоположений і 1869-ім році.

Фенцик зачав писати літературу уж почас своїх штудентьских років. Публіковав стихи, повіданя, а доконця і краєзнавчі статі, котры выходили на сторінках ужгородьских новинок *Свѣтъ*, *Новый свѣтъ* ці у львівських новинках *Слово*.

У 1885-ім році зачав видавати властны новинки, котры мали назву *Листокъ*. Тоты выходили до 1903-го року, до ёго смерти, і цілый час новинки редаговав.

Фенцик, окрем іншого, інтересовав ся і о історію Русинів. Зробив інтересный програм їх бадань, котрый мав назву *Мысли о составленіи нашей історіи*. В роках 1892 аж 1896 на сторінках *Листка* опубліковав довгу статю о історії русиньской літературы, котра вышла під назвов *Очеркъ угро-русской письменности*. В Додатку ку *Листку*, котрый выдавав од 1891-го року, публіковав серію статей о выгодах модерного господарія на селах, про русиньских священиків зробив коло 200 текстів проповідей.

Быв редактором учебників про русиньскы школы з граматіки, математіки, фізіки, географії і історії. Таксамо є автором релігійных робот *Литургика* і *Молитвенникъ*.

Припоминаме собі 95 років од народжіння і 30 років од смерти ЮЛІАНА КОЛЕСАРА

Юліан Колесар (Юлиан Колесар, Драген Юлиан Кольсаров, Julijan Kolesar) нар. 15. 7. 1927 в Дюрдєві, у Сербії бывшой Югославії, умер 26. 3. 1992 у Монтреалі, штаті Квебек в Канаді. Быв вытварным умелцём, поетом і етнографом в Югославії, русиньской народной орьентації.



Ю. Колесар здобыв освіту графіка у Школї ужыткового уменя в Новім Саді (1949 – 1954). У 1966 р. навсе охаблять Югославію і жыє дакілько років у Паріжу і США, де робить як комерціанальний графік (1969 – 1973), потім переходить до Монтреалу, де прожыє звышок свого жывота, присвятивши ся малярству і науковій творчості. Ю. Колесар поужывать розлічны штілы і технікы, пишучі іконы в штілі середнёвічній іконографії, але тыж малює неорелістичны, експресіоністичны, кубістичны і абстрактны полотна. Ёго творы

близкы тематіці жывота войводиньских Русинів, котры суть фаребнов ремінісценцієв із фоклорістичного уменя.

Жыючі в Канаді, Ю. Колесар написав дакілько бадательских работ, присвяченых войводиньским Русинам, і опубліковав їх пріватно під значков, подля ёго властных слов – „Руского институту Ю. Колесарового у Америки“. Є автором выше стовкы работ, присвяченых історії, історіографії, етнографії, языку і історії уменя, написаных, зась подля выслову Ю. Колесара, „панонским руским“ языком. Єдина робота, што дошла ку шыршому колу чітателїв, была посмертно выдана в Югославії „История руского народного мена“ (1966). Векшына літературных творів Ю. Колесара є полемічного характеру. Барз критічно ся высловлює проти україноорьентованій части войводинорусиньских писателїв і лінгвістів, доказуючі, же ёго родный народ є частєв окремого карпаторусиньского народа. У 1990-ых роках родина маляря заложыла сталу выставку жывота і творчості Ю. Колесара в музею етнографії грекокатолицькой парохії с. Дюрдєв. Рукописы умелця суть у Народнім архіві Канады в Отаві.

Література: „Лирични реализм як памятка: Юлиан Колесар, 1927 – 1992“, *Шветлиосц*, XXX, 2-6 (Нови Сад, 1992), с. 179-182; Любомир Медеші, „Шлїди благеі Колесаровой души“, іп Юлиан Колесар, *История руского народного мена* (Нови Сад, 1996), с. 241-246.

Здрой: „Енциклопедія історії та культури карпатських русинів“ зоставителїв П. Р. Магочія і І. Попа, Ужгород: Видавництво В. Падяка, 2010, с. 3544-345, переклад із українського языка: А. З.

ПаедДр. Іван РУСИНКО, Свідник, Словакія

ОРОДОВНИК В УГОРЬСКИМ СЕЙМІ ЗА СВДНИЧАНІВ, ПОСТИГНУТЫХ ПОЖАРОМ

В августі 1904-го року села Вышній і Нижній Свідник постиг великий пожар. Згоріло много хыж, пострадало много родин, котры были монархієв зохаблены на поспас свой судьбі. Люде собі взаємно помагали, приїмали до своїх обысть тых, котры выгоріли, ділили ся і з тым найменшым што мали, лем жебы якось пережыти, а не умерти з голоду і знову ся поставити на ноги.

Скрутну ситуацію погорілых в Свіднику добрі познав і тогдышній опозічний посланець угорьского сейму за зборівський волебный обвод **Др. Михал Артим**, бо Свідник належав до ёго волебного обводу а Свідничане го волили. Быв то він, котрій в угорьским сеймі 1907 року перечітав скаргу Свідничанів і інтерпеловав о штатну поміч про погорілых. Ёго інтерпелация і скарга выкликала парламентну дебатну, што ся достало і до парламентной записниці. Наслідком шырокого вышетрєваня шкод з боку штатных органів Свідничане ся дочекали холем якої-такої помочі. З дирекції Червеного креста в Будапешті пришло до Свідника 200 корун, з уряду Шарішского жупана 400 корун, з фонду піджупана про погорілых было послано веце як 450 корун (відь ŠVORC, P. a kol.: Svidník v premenách času. 2005)

Днесь уж малохто у Свіднику знає, хто то був тот ородовник за погорілых Свідничанів в угорьским сеймі перед веце як сто роками. Др. Михал Артим був грецкокатолицький священник, член конзисторіальной рады пряшівской епархії, радця папской курії Святого Престолу в Римі, політик, русиньский народный культурный діятель, лічитель, мученик за віру і народ, народный будитель Русинів.

Народив ся 14. октября 1848 в селі Никлєва (днесь Мікулашова, окр. Бардеєв) в родині грекокатолицького священника Андрія Артима (народженого 1822 р. в с. Кружлєва, окр. Свідник) і мамы Анны, родженой Подгаєцькой (народженой 1825 р. у с. Варадка, окр. Бардеєв). Мав єдну старшу сестру Емілію (*1847, Варадка), котра ся выдала за Антона Вашковіча, грекокатолицького духовного в Ломнім а трєх од себе молодшых братів: Івана (*1853, Шеметківці), був учитель, Андрія (*12. 10. 1854, с. Дубова) і Антона (*18. 3. 1858, с. Дубова), обидвome были гр.-калицькы духовны. І ёго дідо Іван Артим був священником в селі Кружлєва. окр. Свідник.



(позерай: Čisárik, Juraj: Rodokmeň gréckokatolíckych kňazov v karpatskom regióne. Východné Slovensko. 1657 – 2005).

Михал Артим гімназіалны штудії абсолвовав в Пряшові а теологію на універзиті в Будапешті (1874), де ёго сполукласником був Юлій Ставровський-Попрадов (18. 1. 1850 – 27. 3. 1899), в будучности велика літературна і будительска особность Русинів другой половины 19. ст. (позерай: Др. Бескид Николай: Юлий Ставровський-Попрадов. Ужгород 1929. с. 18). В Будапешті попри штудію теології абсолвовав і два семестры лікарьской факулты, што по роках выужывав як народный лічитель. За священника був высвячений 5. 4. 1875 пряшівским епіскопом Осифом Гаганцєм (котрый був епіскопом од 1843 аж до своей смерти 22. 12. 1875).

Перше свое місто дістав у 1875 р. як каплан

на парохію до села Якубяны, окр. Стара Любовня, одкыль по пару місяцѣх був переложений за справцю фарности до чисто мадярского села Здоба, окр. Кошіці (1875 – 1877), але і ту ся довго не зогрѣв, бо уж в 1877 р. був настоятелѣм церкви в Бехерові, окр. Бардеєв, де пережив своїх плодных 41 років аж до своєї мученицькой смерти, до 26. юла 1918 р.

Была то особность міцно талантована. Ёго професор теології в Будапешті то такой збагнув на молодім штудентови і сконштатовав: „Шкода вас буде до Пряшова!“. Вольні говорив і писав по мадярскы, по німецькы, по латиньскы, знав грецькый і жыдівскый їдіш. Цїлый живот ся снажив звышовати свою кваліфікацію. Зо штудія богословія набыв титул *Vassalagrát*, што ся приближні може рівняти днешньому *licenciátu (ThLc.)*. Як 48 аж 50-річний в 1892 р. успішно зложив в Будапешті доктораньскы рігрозны экзамены з церьковного права і догматикы а набыв титул *Dr.*, жебы міг ліпше і кваліфікованіше быти напомічним своєму збідаченому народу. Быв членом конзісторіальной рады пряшівской епархії, радцѣм папской курії – главного адміністративного і судного органу Святого Престолу в Римі, посланцѣм угорьского сейму. **Была то особность опозічного, выбоного, правду любячого, твердого характеру. Любив край і народ, із котрого вышов, із котрым жыв, котрому по цїлый живот служыв і духовно го підкріплѣвав. Быв ёго радцѣм і лікарѣм.**

Тогдышню русиньску інтелігенцію творили священници, півцоучителі і пару десятков урядників, котры были тотално змадярізованы. Артим був свідомым „руским“- Русином. Выріс в русиньській родині. Ёго отець Андрій був свідомым русиньскым патріотом. Як А. Духновіч в 1850 р. засновав у Пряшові літературне общество (сполочность) – Літературное заведение Пряшевское, став ся єдным з першых стабільных членів того общества, яке і фінанчні підпоровав, а таким свідомым Русином ся став і ёго сын. М. Артим сам о собі ся высловив: „*Будут з мене язык тягати, і так руснаком буду!*“. (Василь Брында: Село Бехеров. Карпаторусский капендарь Л-С на год 1964, с. 141.) З русиньскыма мадяронами ся не контактовав, одсуджовав їх і напоминав. Высмівали ся му, же є *охранця спростаків*. А як Угорьско схвалило закон, же на вшиткых школах в угорьській країні вшиткы учебны предметы і немадярскы народы мають ся учіти по мадярскы, то майже вшит-

ка угроруська інтелігенція стала ся Артимовым неприятелѣм.

Кедь пришов на ярмарок до Бардеєва все окол него была копа людей. Широка околіця го знала нелем як священника, аблегата (посланця) угорьского сейму, але і доброго доктора. (Dr. Korba, E.: *Šli verne s ľudom*. In: *Kalendár SLOVA pre gréckokatolíkov na rok 1972*). При бежерівській фарї все, і в неділю, стояли в літі возы, в зимі санкы з хворыми людьми. Люде о нім говорили же є віщій, бо же знає порадыти каждому хворому. Артим радыв і лічів все задарьмо як нашы старосвітскы *безсребреникы*, брата, св. Козма і Даміан.

В країньскых вольбах до угорьского сейму в 1901 р. як опозічний політик за Країньску католицьку народну страну (котру сам організовав) кандідовав в зборівскім волебнім обводі. Ёго протикандідатом за тот обвод був Мадяр, свідницькый кралѣвскый судця Імре Сепешгазі (16. 1. 1857 Пряшів - 4. 5. 1932 Будапешт), котрый волебный бой з Артимом високо програв. В тім часі і села зборівского волебного обводу належали під свідницькый обводный суд.

М. Артим був дуже популярный меджі народом, так меджі Русинами, як і меджі Словаками. Кедь пришов у часі волеб до Зборова, Зборівчане му не доволили ани з коча зыйти на властных ногах, однесли го рівно на руках аж на нотарьскый уряд зборівскы жены зо співом:

*Eljen, eljen, ejlen budze,
naš pan Artim panom budze.
Sepešhazi do komina
naj še udzi jak slašina.*

А Русины на Маковіці співали по свому:

*Артим Мигаль шувне мено,
на діети¹ выхвалено.
Шепігазі до комина,
най шя будит як сланина.*

*Отец Артим добрый пан
Аблегато² буде нам.
Шепігазі до комина,
най шя будит як сланина.*

Зато, же го і римокатолицькы Зборівчане зволіли за посланця, М. Артим купив їм до костела св. Маргіты вежовы години за 1600 корун.

В далшых парламентных вольбах в тім істім обводі був і по другыраз зволений а ёго посланецькый мандат тырвав так од 1901 до 1910 р. Кандідовав і в далшых вольбах, але в наслід-

ку великої агресивної пропаганди містних мадяронів і урядів лем о барз мало голосів заостав за своїм протикандідатом.

Быв єдним з мала священників, котрый за цілий час Першой світової войны (через бехерівський хотарь двараз перешла лінія фронту там і назад) зістав в селі зо своїма вірниками. Доконця, уступуюча російська армада го перший раз 29. новембра 1914 заяла а одвлекла зо собов аж до міста Ясло (Польско), де го три тыждні тримали і вышетрєвали як зяйтця під „баєнетами” а обвинєвали го зо шпiонства протів російської царської армады. І в 1915 року при другім одступі російської армады з теріторії северовыходного Словенска го знову заяли як рукоємника і одвлеки зо собов аж до Яслиск (Польско). До Бехерова ся вернув аж зачатком юна 1915 (Pramene k vojenským dejinám Slovenska IV/1? VNHÚ Bratislava 2016, с. 116). Село было войсками выдранцоване, спустошене, розбите, выпалене. Артим 14. янувара 1915 в мені села написав главному жупанови стяжність на непропорціоналны реквірації польногосподарських комодіт ракуськоугорьсков армадов од обывателів села а жадав направи. Стяжність підписали: Артим, рыхтарь села і заступця рыхтаря.

Але ани угорьскы штатны органы му не довіровали. Підозривали го зо шпiонства про російську страну а обвинєвали го, же він сам добровольно одышов з російським войском. Зо страны угорьської поліції не было конца-края вышетрованю. Аж як ся листом постяжовав самому цісарєви, єго пронаслідования поліцієв ся змірило, але не перестало.

Арим був єдиним священником на шырокій околиці, який не евакуовав зо села перед приходом російської армады в часі Першой світової войны, а праві тото было прічінов, же го підозривала і мадярська і російська страна.

До цілой Маковіці вніс дух „рускости”. **Як священник був незломным застанцєм выходного, візантійского обряду, юліаньского календаря, кіріліки і азбуки.** Поставив ся проті наряджіння єпіскопа Др. Штефана Новака зо 6. юна 1915 р. о переході гр.-католицької церкви на грегорианський календарь і о повинній латинізації вшиткых учебників на церковных школах, богослужбных церковных книг і молитвеників. Місто кіріліці і азбуки Русины мали поуживати латиніку з мадярським правописом. Свій крок аргументовали тым, же кіріліця і юліаньський календарь суть спуюючим

огнивком Русинів з російсков культуров а латиніка принесе Русинам європску культуру і приправить Русинів на їх мадярізацію (Sulaček, J.: Príspevok k dejinám tlačiarne ukrajinských kníh. In: Historické knižničné fondy, ŠVK, Košice, 1988).

Як протест проті наряджіння єпіскопа Новака написав а выдав на властны наклады дві публікації (Artim, M.: A Halotti beszéd és könyörgés rituális szempontból. Bardejov, 1903. Artim, M.: Memorandum centennariae memoriae erectionis dioeceseos Eperjesiensis. Eperjes 19-a Martii 1916.) а з вікарєм Др. Н. Руснаком (1878 – 1954) вступив до верейной дішпуты (Artim, M.: Contra reputaciones RSSMI DNNI Canonici DRIS Nikolaj Rusznak Ad me Novissime Directas.). Не був в ласці ани церковной, ани угорьської влады, бо був Русин.

Як політик був в тайнім контакті зо Свідничаном Юрком Лажом (1867 – 1929), боєвником проті соціальной несправедливости на Маковіці а пізнішим сенатором в Народнім згромаждіню за першой ЧСР, з котрым сполупрацовав. Лажо ся з ним стрічав, агітовав масы людей за звоління Арима за посланця до угорьского парламенту. Конзултовав з ним став і перспектivy розвоя Русинів (Sulaček, J.: Príspevok ... як горі). Ай Ю. Лажо, подобно як Артим, був в немілости церковной і світської моци. Быв судні репресований а посаджений на два місяці до арешту зато, же „vystupil protiv zavedenija katolickoho kalendarja dľa rusnakov i snišćenija kiriliki” (Lažo, Jurko: Russkomu narodu na Slovensku. Tipografia Ju. Lažo, 1925, s. 4).

В 1918 р Артим уж верейні а остро выступив проті наряджіню єпіскопа Новака. Листом обернув ся на угорьского краля а ракуського цісаря Карла І. (1888 - 1922), жебы му, Артимо-ви, доволив посвятити *паску* єго віруючим подля старого, юліаньского календаря. Краля му властноручні одписав, же „хліб ся може святити каждый день, бо нигде не є написане, жебы были становлены дні, в котрых ся може або не може хліб святити” (Брында, В.: Село Бехеров. Карпаторусский календарь Л-С на год 1964, с. 143). На основі того пасхалны свята і посвячіння *паскы* было в селі подля старого календаря а лист був Артимом перечітаний на Великдень в церкви з казательніці.

Але єпіскоп Новак і штатны угорьскы органы ся з тым не успокоїли. Зінсценовали проті Артима судный процес а 26. юла 1918 р. до бехерівської школы пришов сенат крайского суду, де прикликали Артима. З членів комісії Бехе-

ривчане спознали лем Бекида, наісто Антонія (1855 – 1933), котрый в тім часі був посланцем угорського парламенту. Выслух Артима тырвав од 9-ой до пів другой години пообіді. Як вышов з будинку школы, скаржыв ся групі своїх вірників, котры го чекали при школї, на болесьть в хырбеті і просив людей о поміч, што задокументовав у сільській кроніці тогдышній бехерівський учитель і кроникарь Алексей Фариніч ст. (1863 – 1952). І перед фаров го уж чекало много нетерплячих і выстрашенных обывателїв котрым выголосив: «Єдно єм уж зробил, календарь уж буде по старому а іщі мам другу роботу а то – вышмарити Новака з Пряшова, а кедь то не зможу, так перейдеме на првославіє». В тім моменті ся ани не наздав, же минуты єго жывота суть уж зрахованы. Сїв за обідній стіл к обїду, взяв раз ложков гороховой кашы а другу ложку уж не донїс до уст... Сердце великого патріота не вытримало...

Погребны обряды одкончїв єго молодший брат зо своїм зятєм і сыном за участи духовенства з Маковіці і множеством народа зо шырокой околиці.

На початку 20. ст. в роках 1901 – 1920 М. Артим був єдинов світлов особностїв боєвника за народны і культурны права Русинів.

М. Артим був ініціатором і організатором выбудованя новой мурованой церькви і будинку новой мурованой школы в Регетовці (бехерівской філіалкы), за што го іконописці на іконі св. Николая на іконостасі регетівской церькви звічнили маленьков поставов у спідній части

іконы. Заслужыв ся о выбудованя новой мурованой фары, високой мурованой приступовой дороги (мур) до церьки, мурованого моста через дуже глубокий потік в селі і выбудованя новой мурованой церьковной школы в Бехерові. В селі пропаговав прогресівнішы способы газдованя, овоцинарства, выужываня умелых гноїв і технікы.

З манжелков Марієв, родж. Адамковічовов (1858 – 12. 7. 1901) мали троє дітей: Маргариту Лукрецію (15. 12. 1880 – 27. 12. 1880), Марію Петріллу (12. 1. 1886 - ?) і сына Леонтея (16. 9. 1888 – 19. 7. 1909). Леонтей, студент права в другім рочнику високой школы, трагічно загинув при великій поводні в селі. Вшыткы троє суть похованы на бехерівскім цінтерю а ту спочінув і М. Артим. Марія Петрилла выдала ся за гр.-католицького священника Корбу, родом з теперішній Хмельовой а одышли до Америки. В 1968 р. Марія Петрілла як 82-рочна подаровала фотографію свого отця редакції Карпаторусского календаря Л-С на 1968 рік, котру ту публикуєме.

Позначкы:

*Діета*¹ – передволебна кампань за Ракусько-Угорьска.

*Аблегат*² – ablegát, посланець країнського парламенту за Ракусько-Угорьска.

Петро МЕДВІДЬ, ЛЕМ.фм

Кандідовати на пост пряшівського жупана буде і Русин з Меджілаборець – Михал КАЛИНЯК

В минулости був і председом МО РОС в Пряшові. На пост председа Пряшівського самосправного края (ПСК) буде кандідовати сучасный центральный директор Канцеларії Здружїня міст і сел Словакії (Združenie miest a obcí Slovenska), родак з Меджілаборець, Михал Калиняк.

Кандідатуру Калиняк потвердив про агнетуру TASR в середу, **3-го августа 2022**. Вольбы до містной і крайской самосправы будуть тот рік першы раз споены, і председа Народной рады Словацькой републікы їх выголосив на суботу, **29-го октобра 2022**.

Обчаньский кандідат

Як Михал Калиняк інформовав агнетуру TASR, кандідовати в осінніх вольбах буде як обчаньский кандідат, значить **не буде кандідатом політичной партії**. Єдночасно сі усвідомлює важность штонайшыршой підпоры свого програму про єго ефектївну імплементацію.



„Зато я порихтований стрічати ся з політичними партіями, котры ся інтересовали о мою припадну кандидатуру, жебы єм їм представив тезы свого програму,“ повів. Політичны партії го можуть підпорити і як обчанського кандидата.

У своїй візії видить спектр проблемів найлюднатішого края в Словацькій республіці, при їх рішаню хоче схосновати і скушености із 20-рочного діяння в области самосправ. **„На многы проблемы мож схосновати рішіня, котры не суть дороги, а ани залежны од еврофондів як єдиной спасы. Знам, же ся то дасть, і знам як на то,“** декларує.

Схосновати хоче і детеперішню роботу в структурах Здружіня міст і сел Словакії, о то веце, же централну організацію містной самосправи бере як важного партнера і при регіоналнім розвитку.

„Высший територіалный цілок мусить быти великий брат міст і сел, то алфа і омега. Зато є моєв візієв, жебы єм не сполупрацовав лем з крайськыма посланцями, але і з регіоналными здружінями Здружіня міст і сел Словакії. В рамках робочого діару бы зато были і выїзды на засіданя тых регіоналных здружінь,“ повів на марго своєї представы о веджіню края.

Тісніше перепоїня меджі містнов і крайсков самосправов бере Михал Калиняк за важне на цілодержавній уровни.

Михал Калиняк

Кандідат на пряшівського жупана Михал Калиняк походить з Меджілаборець. На Філозофіч-

ній факулті Пряшівської універзиты в Пряшові штудовав комбінацію політологія – український язык і література. Тоты штудії закончів у 2004-ім році, о рік пізніше на тій самій універзиті обгаїв рігорозну роботу. На Пряшівській універзиті був пізніше інтерным докторандом, займав ся теорієв політики. Докторську роботу з того фаху наконець обгаїв на Філозофічній факулті Універзиты Павла Йозефа Шафаріка в Кошіцях. Калиняк є знамый як одборник на самосправу і представитель Здружіня міст і сел Словакії. Регуларно го мож відіти в медіях. Быв і говорцём пряшівской а петыржальской радніці. В минулости був і у практичній політиці. Быв містськым посланцём в Пряшові за партію Smer в роках 2012 аж 2016, де жыє, передтым в Меджілабірцях, одкаль походить, в роках 2002 аж 2006 був містськым посланцём за SDL (Партія демократінчой лівіці).


Быв і говорцём Міністерства школства, науки, баданя і шпорту Словацькой республіки, таксамо говорцём підпредседы влады про сполочность знань, европскы sprawy, людськы права і меншыны. Діяв як член веце експертных груп.

Активний був і у русиньскім русі. Єден час був доконця у функції председы Містной організації Русиньской оброды в Пряшові.



Припоминаме собі 35 років од смерти Народного умелця України – Андрія КОЦКЫ

Андрій Коцка ся народив 23. 5. 1911 в Ужгороді в тогдышнім Угорьскім кралёвстві, теперь на території України, умер 3. 9. 1987 в Ужгороді в тогдышнім ССРСР, теперь Україна. Быв малярём на Підкарпатській Руси.



По скончіню Ужгородьской грекокатолицькой учительской семінарії ся А. Коцка учів у Публічній школі малёваня (1931) під веджінём Йосифа Бокшая і Адалберта Ерделія. Далє продовжовали ёго штудії в Академії уменя в Римі (1940 – 1942).

Меджі найліпшы работы майстра належать портреты із підкарпатьской Верьховины, главно образы дітей: **Пастырька гусок** (1932), **Марійка** (1933), **Хлопчік** (1934), **Школярі** (1937), як і цікл імпресіоністичных жанровых сцен, реалізованых пастелом і квашом: **Ужгород** (1939), **При церькві** (1940), **Процесія** (1940), **У неділю** (1940) і іншы.

На зачатку советьского режіму по Другій світовій війні під тиском ідеології комуністичной влады А. Коцка сотворив портреты партізанів: **Василь Русин** (1947), **Василь Свіда** (1947), (позн. ред.: **Василь Зозуляк**, котрого портрет є теперь у депозиті Музея україньской културы у Свіднику) і героїв работы: **„Старий колгоспник“** (1950), **„Ланкова Пелагія Гебеш“** (1955), **„Столяр М. Пахта“** (1956). Тоты работы не мали значну естетічну цінность, але одповідали політичным потребам влады. У половині 1950-ых років А. Коцка ся вертатъ ку передвоинновым темам і штілу, малює серію портретів жен Верьховины: **Дівча з Колочавы** (1955), **Гуцулка** (1958), **Приятелькы** (1963), але тыж лірічны імпресіоністичны закутины природы: **Зима в селі Тихе** (1954), **Ярь у Ясынях** (1969).

У 1982 р. А. Коцка бив оцінений названём Народный умелець України. По смерти майстра ёго дім в Ужгороді бив перетвореный на музей.

Література: Володимир Павлов, *Андрій Коцка: альбом* (Кієв, 1993); Юрій Небесник, Михайло Дуран, *Андрій Коцка: альбом* (Ужгород, 2002).

Здрой: „**Енциклопедія історії та културы карпатських русинів**“ зоставителів П. Р. Магочія і І. Попа, (Ужгород: „Видавництво В. Падяка“, 2010, с. 369-370), переклад із україньского языка: А. З.


Проф. Др. Іван ПОП, др. н., Хеб, Чеська република

Єдину выznamну русиньску сохарьку – Олену МАНДІЧОВУ споминаме ку ей 120-рочу

Олена Мандічова (Олена Мондич, Jolana Mandičová, дівоче мено і призвиско: Ілона Шіналі) нар. ся 26. 9. 1902 в Джулешті тогдышнёго Угорьского кралёвства, теперь на території Румунії, умерла 12. 3. 1975 в Кошіцях тогдышнёй Чехословакії, теперь на території Словакії. Перша професіонална сохарька меджі Русинами Чехословакії.

По скончіню гімназії в Кошіцях і Будапешті О. Мандічова перешла до Прагы, де почас короткого часу штудовала на Высшій школі про-

мыслового і ужыткового уменя „Ум прум“ (1921 – 1922), потім – в Академії вытварных умень (1922 – 1925), де ей учителём бив знамый чесь-



• Авторков бусты народного будителя Русинів – Адолфа Добрянського на памятнику із 1928 року в Михаловцях на Словакії є Олена Мандічова.

кый сохарь Ян Штурса. У 1926-ім році путовала до Мніхова, Паріжа і Італії. Того самого року ся оддала за Івана Мандіча, што приспіло заінтересованю ся отчизнов свого мужа – Підкарпатськов Русєв. Іщі як штудентка О. Мандічова робила над портретами і сохами русиньських культурных діятелів, а в 1926 році ей біломраморова буста **Євгена Фенцика** была іншталована на памятник в **Ужгороді**. В тім же часі О. Мандічова створила соху **Вівчарь**, котра была першов з ряду ей работ, што были присвячены традиционному жывоту Русинів. Далшыма были сохы: **Лісоруб**, **Алегорічна композиція** і **Карпаторуська пісня**. Тогды дістала дакілько обіднавок на створіня буст: **Адолфа Добрянського** в **Михаловцях** (1928) і **Ужгороді** (1929), **Александра Духновича** в **Колочаві** (1930) і в **Хусті** (1932). Найзнамішов з ей работ была соха президента Чехословакії **Томаша Г. Масаріка** у животній великості, што была 1928 р. дана на памятник на єднім із главных намість **Ужгороду**, котра стояла аж до припоїня Ужгороду до Мадярська на концю рока 1938 (соха была вывезена до Чехії, а пізніше знищена повойновым комуністичным режимом Чехословакії).

У 1930 р. О. Мандічова здобыла штіпендію од чехословацького міністерства освіти на штудії у Франції. По навернутю із Франції створила

сохы двох губернаторів Підкарпатської Русі – **Грігорія Жатковіча** (1931) і **Антонія Бескида** (1931). Вершынов творчості О. Мандічовой были скульптуры **Александра Митрака** – в **Мукачові** (1931) і **Александра Духновича** – в **Пряшові** (1933). Про послідню велику соху авторка приправила дакілько варіантів, із котрых наконець був выбраный тот, што зображує народного будителя як учітеля, што стоїть ведно із школярєм.

З розпадом Чехословакії і початком Другой світової войны умелецьке діятельство О. Мандічовой ся скончіло. Войновы roky пережыла з родинов у Мукачові, а потім у Будапешті. Важна хворота їй знеможнила далше вытварне діятельство. Послідніх 30 років жывота О. Мандічова зістало фактічно забыта, робила касірку в обході в Кошіцях.

Література: Владислав Грешлик, „Незакінчене танго: до недожитого 85-річчя О. С. Мандич“, *Дукля*, XXXV, 5 (Пряшів, 1987), с. 59-63; Владислав Грешлик, „Творчість Олени Мандич міжвоєнного періоду“, in Mikuláš Mušinka, *zost. Zakarpatsьka Ukraїna v skladі Чехословаччини, 1919 – 1939* (Пряшів, 2000), с. 207-214.

Здрой: „Енциклопедія історії та культури карпатських русинів“ *зоставителів П. Р. Марочія і І. Пона*, (Ужгород: „Видавництво В. Падяка“, 2010, с. 442-443), *переклад із українського языка: А. З.*

Споєный скоро зо вшиткым коло Енді Варгола (Михал Бицко славить 70 років.)

ПаедДр. Михал Бицко, ПгД, Ф. А. Б. І. (Fellow of The American Biographical Institute), є главным куратором Музея модерного уменя Енді Варгола (ММУЕВ), главный актер заложія ММУЕВ у Меджілабірцях і емерітный президент Сполочности Енді Варгола (СЕВ), витварный теоретік, умілецький куратор, музеоедуколог і публіціста.

Народив ся 12. октобра 1952 у Гуменнім, але виростав у Збудьській Білій в окресі Меджілабірці. По матурі штудовав на Катедрі витварной выховы і на Катедрі українського языка і літературы Педагогічної факулты у Пряшові Універзіты Павла Йозефа Шафаріка (УПЙШ) у Кошіцях. Освіту собі доповнёвав екстернов формов штудій спершу на Катедрі витварной выховы Філозофічної факулты УПЙШ і наслідно, по споію катедр Філозофічної і Педагогічної факулты УПЙШ, докончів штудії на Катедрі витварной выховы Педагогічної факулты УПЙШ у штудійнім одборі Теорія навчання общонавчальных предметів – учітельство про середні школы. В році 1980 здобыв академічний тітут доктор педагогікы (PaedDr.) а в році 2003 по абсолвованю доктрандських штудій на Універзіті Матея Берла в Баньській Бістріці, на Пряшівській універзіті в Пряшові і обгаїнем дізертачной роботы на тему *Уменя, перцепція, сугесція, маніпуляція і дітина* Пряшівска універзіта му уділила научно-академічний тітут філозофії доктор (PhD.). По скончіню штудій робив у резорті школства і културы як витварный педагог на Основній умілецькій школі в Меджілабірцях і як екстерный робітник Містьського центра културы в Меджілабірцях.

У 1990-ім році заложыв Сполочность Енді Варгола і в році 1991, ведно з братом Енді Варгола – Джоном Варголом і президентом Варголовой надації в Нью Йорку Фредеріком Гюгесом заложыв Музей модерного уменя Енді Варгола (первістна назва была Музей модерного уменя родины Варголовых).

Меджі ёго інтересы належить музика і одборна література. Є автором многих композицій сценічной музыки і співанок про діти і молодеж, а тыж 5-ёх монографій о музеоедукології, Енді Варголови і сучаснім уменю. Выдав 3 зборники поезії у словенськым і русинськым языку. Є автором многих статей в розлічных медіях дома і за границями отчизны, котры ся занимають уменём, выховов і културов вообщє. Америцькым біографічным інштїтутом в США быв вецєраз оціненый за роботу в уменю і в освіті. Ёго мено є увєдженє в шєстєх енциклопедіях дома і в заграничу. Є лавреатом Меджінародной премії Треббія 2017.



Розговор із Михалом Бицком (скорочєный)

Д. Б.: А што Твої колегове в роботі? Тадь мусять знати, же тот Бицко ся жертвовав про заложія субъекту, котрый їм дає роботу!..

М. Б.: Я ся не жертвовав зато, жебы дахто дїстав роботу і под. Жертвовав єм ся про vznik музея Енді Варгола, а то є вшитко...

Д. Б.: В умілецькій і културній громаді Твоє мено резонує ... Каждый знать, што єсь зробив, каждый знать, вдяка кому ся стало знаме ваше місто, але і край, і република ... Знам, же Твоє мено є в многих публикаціях і енциклопедіях ... Часто путую по світі і стрічам ся з кураторами і умєльцями, у котрых маш решпект і почливість ... Здасть ся Ті, же є то самособов? Ты сам не чуєш потребу узнаня і под.?

М. Б.: Не задумую ся над тым ... В посліднім часі єм сі зробив такый частковий авдіт у своїм жывоті і выселектовав єм дакотры реалії, котры єм задефіновав як збыточны. Зістало мі то, што мам в почливости і кого мам в почливости ... То є днесь про мене оснований моєй філозофії бытя. Барз мі в тім помагать отець духовный, мій сповідник і приятель о. Мефодій Біланчик, представитель Чіну св. Василя Великого

... Наши розговори ми помагають на моїй пути жывоном. Уведу приклад. Познав ем барз добрі вызначного ученого, універзїтного професора, котрый выховав десятки молодых ученых, помагав при створёваню сїстемы нашого высокошколства, мать десятки оцінінь з цілого світа, а кедь ся пан професор став пензістом, не споманув сі на нёго скоро нихто. Нашто му давали тоты оцініня, кланяли ся му про ёго научны способности, кедь днесь му не знають прийти на мено ... Люде мають страшно коротку память на то добре, што про них было зроблене ... Зато я нігда не чекав, не чекам і не буду чекати на някы премії, оцініня і іншы „едноразовкы“. Моя бабка говорила: „Правы партізане повмерали, абы тоты, котры ся ховали за буком, на трїбунах стояли ...“ Думаем сі, же то платить все!

Д. Б.: Став есь ся емерітным президентом Сполочности Енді Варгола і дале есь главным куратором ММУЕВ у Меджілабірцях. Як ся позераш днесь на музей і на ёго будучность?

М. Б.: Выконным президентом СЕВ і директором ММУЕВ ся став Мгр. Мартін Цубяк ... Вірю му, бо є то способный молодой вытварный теоретік і куратор, зарезоновав уж і в заграничу ... Здобыв добре мено і у віцепрезидента Фондації Енді Варгола в Нью Йорку, перешов фалаток світа, мать за собов десятки добрых проєктів, і в публікованю є активный. В тім віджу істоту сучасности музея ... Будучность? Кедь талант, способности, охоту, професіоналность, розум не забє урядницька глупость і збыточна бірокрація і політїзованя, ММУЕВ мать будучность. Кедь буде наспак, стратить „значку“ в назві – мено Енді Варгола. В тім припадї то буде уж лем обычайна „културно-освітня інштїтуція“, а не музей Енді Варгола. За тото суть одповідны тоты, котры з позїції справців засягають до музея і часто віджу, же суть то засягы ділетантськы і початок ліквідації єдиного музея Енді Варгола в Европі а першого у світі. Факт, же тот музей ем заложыв як єден із тройці (Джон Варгола, Фред Гюґс і я) є про мене жывоным успіхом, і факт, же ем го многы роки „тримав над водов“ і дістав до свідомости світа є моє ціложывотне оцініня і діло. Цї ся то дакому любить, або ні! Недавно ем у розговорї з МУДр. Штефаном Сотаком, котрый є моім „медичиньскым радцём“ і доктором, высловив речїня: „Штефана, я уж у віці, кедь потребуу лем здравя і покій!“ Він мі на то одповів: „Маш то, лем сі то мушиш усвідомити і брати то як факт!“ То бы ем поужыв і як „епїтаф“ ... (смїх ...).

Д. Б.: Михале, не хочу то далшым можным вопросом поспути ... тото Твоє закончіня ... Тримлю Тї палці і дякую за розговор.

Мала історія Музея модерного уменя Енді Варгола в Меджілабірцях

Выникнутю Музея модерного уменя Енді Варгола в Меджілабірцях передовали выставны актївіты, реалізованы Михалом Бицком, ПгД., найперше в Малій галерії Клубу приятелїв вытварного уменя при вытватнім одборї Народной умелецькой школы в Меджілабірцях і пізніше Сполочности Енді Варгола в Меджілабірцях. Почас екзїстенції той інштїтуції в часї бывшего політїчного режіму Михалови Бицкови, ПгД., ся подарило позбєрати дость много документів і автентїчных матеріалів о жывоті і творчости Енді Варгола, котры днесь суть частєв збіркового фонду і архіву музея.

Офіално музей быв створеный Міністерством культуры Словацькой републікы в році 1991, од 1. апрїля 2002 є в зряджовательській позїція Вышого терїторіалного цілку Пряшівского самосправного края. В році 1973 ся Михал Бицко першыраз стрїтив з меном Енді Варгол почас високошкольскых штудїй, на лекціях проф. Івана Нестора Шафранка.

У 80-тых роках по скончіню штудїй, кедь Бицко робив у Меджілабірцях як учитель, дале глядав, бадав по інформаціях о америцькім поп-артовім умелцєви Енді Варголови і ёго корінях. Посередництвом Любіці Противняковой ся дізнав о бабці Еві Безековой, котра была наймолодшов сестров Ендіёвой мамы Юлії, же жыла в Миковій. Здобыв першы родинны фотографїї і корешпонденцію Варголовых і Безековых. Владимір Противняк, манжел Любіці, ся в США стрїтив із Ендіёвым братом Джоном Варголом. І так походжіня было потверджено: родина походить зо села Микова на северовыходї Словакії.

22. фебруара 1987 у Нью Йорку вмер Енді Варгол.

Рік 1987. Джон Варгола навщївив свою родину на выходній Словакії. 16. септембра ся особно з ним стрїтив Михал Бицко і запропоновав му, жебы помїг добыти даяку вытварну роботу Енді Варгола про даяку словацьку галерію, Джон Варгола обїцяв, же як віцепрезидент The Andy Warhol Foundation for the Visual Arts v New Yorku (Надація Енді Варгола про візуалне уменя в Нью Йорку) буде просаджовати тоту думку.

Рік 1988. Зачала ся комунікація з данов надацієв, котра жадала рокованя з офіціалнов інштїтуцієв, найліпше з музеєм. Проходячі рокованя были овпливнены тогдышнєв політїчных і сполоченьсков сїтуацієв і прїнїманя западного уменя евоковало дашто негатївне і нежелане, зато многы інштїтуції не хотїли і бояли ся вступовати до рокованя.

Рік 1989. Міхал Цїгларж і Рудо Прекоп в януарї надвязали контакт з Михалом Бицком. У юну реалїзовали выставку поп-артовых графік Міхала Цїг-

ларжа в Меджілабірцях, котра мала великий успіх. В септембрі прошла петіція за створіня музея, котру ініціювали пражскы вытватници Міхал Цігларж, Алеш Найбырт і фотограф Рудо Прекоп. Окрем інших вынамных особностей, петіцію підписав і тогдышній дісидент і быдучій президент Чехословакії Вацлав Гавел.

Наслідовало рокованя о реконструкції старой пошты про потреби музея. Зачатком новембра Михал Бицко наінштаував выставку о Енді Варголови, де были выставлены документи і пропагачны матеріалы о Енді Варголови, были опублікованы факты о русиньскім походжіню умелця. Выставка была отворена 16. 11. 1989, сімболічно день перед ніжнов революціев. По паді тоталіты (17. 11. 1989) одразу о Варгола проявило інтерес веце інституцій і міст. 28. децембра 1989 був схвалений штатут музея в Меджілабірцях.

Рік **1990**. Джон Варгола другый раз навщівив Меджілабірці. Місто му уділило честне обчанство, але одышов скламаный з поступу работ на реконструкції будовы старой пошты. Одповідны функціонарі ей не забезпечили. Позіція ньюорьской надації і ей президента А. Л. Джіллеса была єднозначна – ку пожычїню образів Енді Варгола може дійти лем по докончїню просторів про музей.

22. марца 1990 была створена неполітична і нештатна Сполочность Енді Варгола (СЕВ, SAW).

В **апрілю 1990** была реалізована стріча представителів міста Меджілабірці з президентом надації Арчібалдом Л. Джіллом в Нью Йорку. Делегацію творили: Ян Бицко, Евген Галишін, Михал Турок-Гетеш і Владимир Противняк. Рокованя было замірять на офіціалну назву музея і рішали ся таксамо комплікації з реконструкціев будовы.

Рік **1991**. Містьський уряд в Меджілабірцях дав музею к діспозіції новопобудований Дом культуры в Меджілабірцях – дві третини будовы дістав музей до поднайму. На управі інтерьеру брали участь Міхал Цігларж, Рудо Прекоп, Михал Бицко і архітект Штефан Пацак. Надація была інформована о приправлених просторах про музей.

У **маю 1991** Пол Варгола (брат Енді Варгола) послав дакілько своїх образів і образы свого сына Джеймса як дарунок новому музею.

30. юна 1991 было святочне отворіня Музея модерного уменя родины Вархоловых (ММУРВ, ММУРВ).

1. септембра 1991 Міністерство культуры Сло-

вацькой републікы у Братіславі офіціално створило музей як самостатный правный субект.

9. септембра 1991 было ракуськов фірмов доправлено 13 оригіналів Енді Варгола до Меджілаборець. Дарунок допроводжовав Джей Шрайвр, тогдышній Варголів асістент, член Надації Енді Варгола про візуалне уменя в Нью Йорку.

5. октобра 1991 одбыла ся святочна вернісаж выставки *Енді Варгол у краю своїх родічів*. На вернісажі взяв участь і Джон Варгола, і міністер культуры СР Ладіслав Снопко. Частев споминаной выставки была і выставка творів Пола і Джеймса Варголовых.

З Прагы був одправеный спеціалный влак до Меджілаборець „WARHOLTOUR“. Выставку попозерало выше 2 тисяч людей.

В році **1994** в Піттсбургу выник другый музей на світі присвячений Енді Варголови.

В році **1997** ся назва музея змінила на Музей модерного уменя Енді Варгола в Меджілабірцях (ММУЕВ, ММУАВ).

1. апріля 2002 ММУЕВ був зряджовательсков листинов Высшого територіалного цілку Пряшівского самосправного края вымежденый як надрегіонална, зберательска, научно-бадательска, культурно-освітня інституція в музейнім і галерійнім діяльстві.

16. новембра 2002 ся одбыла інавгурація 230 центріметрів высокої сохы Енді Варгола од проф. Юрая Бартуса перед будовов музея.

22. юна 2006 Джеймс Варгола промовав свою книжку *На навщіві у славного стрыка землев із Миковой*.

24. децембра 2010 умер Джон Варгола, старший брат Енді Варгола, єден із закладателів музея.

В році **2011**, почас святкованя 20-роча заложіня музея была одкрыта памятна табла Джонови Варголови.

29. януара 2014 умер Пол Варгола, найстарший брат Енді Варгола.

В році **2016** ославив Музей модерного уменя Енді Варгола в Меджілабірцях **25. років од свого взнику**. При тій нагоді музей навщівив сыновець Енді Варгола – Доналд Варгола зо своєв манжелков і сыном Енді.

(Зо словацького языка перетлумачів А. З.)

РУСИН Одборный і літературный часопис выдавать Академія русиньской культуры в СР (6х гоґне, náklad 1100 ks, IČO: 17079748). Предлатне 12 євр. Адреса редакції: Академія русиньской культуры в СР, Duchnovičovo nám. 1, 080 01 Prešov, SR. Телефон: 0917 171 912. Шефредактор: Мгр. Александер Зогуляк, языковий редактор: ПгДр. Кветослава Копорова, ПгД., редактор: Мгр. Михал Павліч, ПгД. Регістрачны чїсла: ISSN 1339-5483, EV 328/08, МІС 49 589. Адреса на интернеті: www.rusynacademy.sk, e-mail: zozulakpo@gmail.com. Выдане 12. октобра 2022 р.

**KULT
MINOR**

FOND NA PODPORU KULTURNÝCH MĚNŠIN


Realizované z finančnou podporou Fondu na podporu kultúry národnostných menšín



Юрко ХАРИТУН

Мої пішники

• Обалка четвертой тогорочной книжки Академії русиньской культуры в Словацькій републиці – Мої пішники знамого русиньского автора Юрка Харитуна з Кежмарку.



• Часта тема олійних фігуральних образів Народного умельця України Андрія Коцьки – Гуцулка.